

東
華
續
錄

東華續錄

乾隆九十七

臣王先謙敬編

臣周濟蕃恭校

乾隆四十八年癸卯春正月甲午查禮卒以伊星阿爲湖南巡撫

○乙未調永保爲蘇州布政使景祿爲直隸布政使以王站住爲

湖南布政使調伍拉納爲河南按察使以姚頤爲湖南按察使由陝

西糧○辛丑諭閔鶚元畢沅前以王直望事獲譴降給三品頂帶

仍留巡撫之任停支廉俸但巡撫養廉原爲平日辦公之用若永

遠停其支給未免伊等轉有所藉口今已一年有餘伊二人辦事

尙屬勉著加恩復還原品頂帶其巡撫養廉仍准其支領以示

體恤朕於諸臣功過黜陟斟酌權衡一視其人之自取各督撫其

各勉圖稱職潔己率屬以副委任○甲辰移雲南府通判駐省城

命水利同知管哨局事○丁未諭兩江總督薩載閩浙總督富勒
渾等合詞陳奏以江浙兩省臣民望幸情殷且河工海塘以次告
竣一切善後事宜尤冀親臨指示懇請於乾隆四十九年春六舉
南巡盛典以愜輿情一摺朕自庚子南巡時巡閱高家堰石塘及
徐州城外石隄鉅工俱逐一親臨指示茲據奏以次告成所有一
切善後事宜自應臨蒞閱視指授機宜俾河流永慶安瀾至浙省
海塘前經降旨將柴塘四千二百餘丈一體改建魚鱗石塘爲濱
海羣黎永資捍衛今要工將竣亦不可不親爲相度且自四十一
年告功闕里後閱時已久應行展謁孔林以伸景仰今據該督
撫等合詞陳奏江浙兩省耆庶望幸悃忱著照所請於乾隆四十
九年五月諏吉啓鑾祇謁孔林巡幸江浙順道親閱河工海塘
所有各處行宮坐落俱就舊有規模略加葺治毋得踵事增華致

滋繁賈該督撫等其善體朕意妥協辦理副朕省方問俗觀民孚
惠至意○戊申實授薩載兩江總督畢沅陝西巡撫劉秉恬雲南
巡撫○庚戌免直隸未完耗羨○壬子敕諭霍罕伯克那爾巴圖
曰爾巴圖繼爾祖額爾德尼爲霍罕伯克前曾遣使來請朕安今
復感戴朕恩遣使具疏請安篤誠可嘉使臣鄂布勒克色木前來
朝覲施恩賜宴茲以特恩賜爾敕諭賞爾巴圖粧蟒段匹玻璃簪
器等物交與鄂布勒克色木帶回並賞鄂布勒克色木錦段絨紬
皮張銀兩其跟役四名亦各賞銀兩段匹仍派侍衛照料遣回到
時爾其祇領惟當感戴朕恩益矢誠悃至爾所請將前在葉爾羌
私販玉石擬絞監禁回犯阿布拉賞還一事鄂布勒克色木已代
爾奏但阿布拉之罪原應正法因係邊遠無知回人未經正法止
行監禁今以爾欣戴朕恩遣使奏請特施殊恩姑予寬免將阿布

拉交使臣鄂布勒克色木帶回此格外寬典非可屢邀嗣後不得以此等事再行瀆奏阿布拉到後爾其嚴行管束勿令復滋事端汝屬下一切人等不時善爲教訓使各安居與鄰部和好勿倚強陵弱凡事俱遵駐喀什噶爾葉爾羌大臣交派而行安分自守以期永享朕恩特諭○癸丑刑部以臺灣械鬪首犯謝笑之子謝長等覈擬具奏諭向來大逆緣坐人犯應行問擬斬決者俱降旨從寬改爲斬候秋審時亦不予勾以昭法外之仁但此案謝笑因漳泉二郡民人構釁輒敢倡議寫帖糾聚莊民械鬪焚掠與反叛無異見在首夥各犯拏獲治罪者已有二百餘名至彰化諸羅各莊被奸民焚搶殺害者又不知若干人皆由該犯起意糾聚釀成大案實屬罪大惡極該犯之子謝長與尋常逆案緣坐者不同著卽照大逆緣坐律卽行處斬交該督撫派委妥員解往臺灣於犯事

地方正法示眾俾奸頑共知法網森嚴卽逃至內地亦必緝獲治罪以靖海疆而安良善餘著照部議完結至雅德將逆犯謝笑之子僅擬發遣實屬寬縱雅德著交部嚴加議處○開鎮江新河○丙辰諭前軍機大臣會同刑部審擬吏部侍郎阿肅家乳婦王朱氏謀害伊主幼子一案供詞內有正月初七日二更時合家俱聽影戲之語朕以是日係齋戒且值忌辰阿肅家不應演唱影戲指出詢問隨經軍機大臣奏請將阿肅交都察院嚴加議處並自請同刑部堂官一併議處等因本年新正初二三等日卽逢時享致齋之期朕雖未能親詣行禮值齋日內並不聽演音樂至初五日方始幸豐澤園筵宴外藩阿肅身爲侍郎豈不知之乃竟於齋戒忌辰期內伊雖在外任聽家中演唱影戲卽據稱爲娛侍伊母亦豈不可稍待數日至元宵令節耶阿肅乃滿洲侍郎又係翰林出

身何至不知禮制昏憤若此且本日召見阿肅詢及此事並加慰問伊子鄰死而得活將來或尚可成器伊毫無感恩惶悚之意竟同木偶看來阿肅全係沾染習氣非無心過誤可比阿肅著交都察院嚴加議處所有軍機大臣及刑部堂官自請議處之處著加恩寬免○己未禮部議覆刑部尚書管順天府府尹胡季堂等奏順天府府丞專司學政向來止考大興宛平兩縣童生餘各屬均山四路同知於駐紮處所設棚考試查各該同知有地方事務且所處衝要每遇委查要件卽致稽延試期請將四路二十二州縣府考一體改歸府丞專管應如所奏再四路內惟東路通州有學政考棚應卽令各屬童生俱就該處考試至府丞試畢卽屆學政考期於士子亦便從之○庚申諭昨御史秦清奏請嚴禁外省餽送以清虧空一摺因其語無指實降旨令將見在各省餽送者何

人受餽者何人虧空者何處逐一指出明白覆奏原欲其據實糾參朕不難嚴查重辦以儆官邪今日據奏清覆奏實因一己私見以爲虧空由餽送所致是以冒昧入告欲因已往而戒將來意中原無其人並無其處等語所奏全屬空言毫無實際此風斷不可長從前錢澧參奏國泰一案卽時特派大臣查審辦理其所參款蹟雖未盡實已就審實各款將國泰治罪錢澧加恩升用然此事朕本早有風聞是以一經被參卽行辦理原非僅因錢澧之奏也至王亶望陳輝祖各案想早在人耳目朕待科道之奏參已久而總未見其人始行查辦破案可見漢人科甲官官相護牢不可破設使國泰係科甲漢人想錢澧亦未必卽行參奏也明季科道陋習始則撫拾浮詞互相攻擊繼且各立門戶伐異黨同甚至置國是於不問轉以廷杖博譴直之名此卽所謂妖孽非國家所宜有

不可不防其漸朕辦理庶務大公至正諸事必期覈實施行從不肯飾虛文以示採納嘗觀魏徵所上十漸等疏亦止泛論事理唐太宗以魏徵本非秦府舊僚意存籠絡從而嘉賞而魏徵亦藉此沽名邀寵是君臣間相率爲僞而未能相與以誠轉不若馬周諫太宗云陛下避暑九成宮處太上皇於暑地其語較爲肫切也總之言官入告必實有關於吏治民生整飭紀綱者方不愧臺諫之司若徒以空言邀獻納之名而全無指實設此科道何用耶將此通諭中外知之

二月癸亥郎若伊因病解任以王昶爲直隸按察使○甲子 上御經筵○諭陳輝祖抽換王亶望入官財物一案前經大學士九卿等定擬應斬請旨卽行正法彼時朕細覈陳輝祖所犯情罪不過無恥貪利罔顧大體究非若王亶望之捏災冒賑侵帑殃民者

比所謂與其有聚斂之臣甯有盜臣是以從寬改應斬監候秋後處決昨據福崧奏到浙省嘉興府屬之桐鄉縣有聚眾鬧漕之事並稱歷年以來因循釀成積弊上年該縣卽有聚眾喧鬧之事案犯僅擬枷杖完結其知縣另案參革顛預了事故奸民罔知懲創復蹈故轍又據富勒渾奏訪查浙閩兩省虧空其倉穀一項各州縣俱未能足額見在飭屬逐一清釐查辦又黃仕簡等奏查鄂臺灣械鬪匪犯見已獲二百餘人各摺遂命軍機大臣等會同刑部堂官將福崧等原摺發交陳輝祖閱看傳旨詢問據供上年桐鄉縣鬧漕一案因恐長百姓刁風是以將知縣參革時僅就其辦案不知輕重參奏並未指名辦漕今又有聚眾喧鬧之事實是我姑息養奸未曾嚴辦所致至地方諸事不能實力整頓閩浙兩省武備廢弛倉穀虧空亦皆是我因循貽誤自取重罪等語是陳輝祖

在總督任內惟務營私牟利而於不肖官吏浮收漕糧及刀民鬧漕之案卽云恐長刁風故以別事參革知縣何不將此情密行摺奏轉撫拾別案希圖避重就輕將就完事以致刀民以督撫不敢指名查辦遂致愍不畏法益無忌憚復釀成桐鄉又有鬧漕之案至於閩浙兩省各州縣倉庫虧缺及武備廢弛陳輝祖俱漠不關心竟似置身局外其平日一味營私牟利隱匿迴護貽誤地方種種積弊不可枚舉實與勒爾謹王直望情罪無異今據軍機大臣刑部堂官審明仍照前擬請旨卽行正法是陳輝祖之罪實不止侵隱入官財物尙可量爲末減朕亦不能再爲曲貸矣陳輝祖本應照例卽行正法但念伊辦理海塘尙無貽誤著加恩免其肆市卽派福長安穆精阿前往將此旨明白宣諭監視賜令自盡以爲封疆大臣廢弛地方者戒朕辦理庶獄輕重必權衡至當若陳輝

祖之從前僅止抽換官物是以貸其一死及此時之貽誤地方不能再爲屈法施恩皆一秉大公至正毫無成見大小臣工當各知感畏力圖稱職毋負朕諄諄懲誡明刑弼教之至意將此通諭中外知之○乙丑諭都察院奏將吏部侍郎阿肅議以革職一摺阿肅係滿洲侍郎於齋戒忌辰之日任聽家中演唱影戲非尋常錯誤可比阿肅著革去侍郎第念其在上書房行走仍兼公中佐領所遺吏部侍郎員缺著諾穆親調補其工部侍郎員缺著塔彭阿補授○以鄂寶爲盛京戶部侍郎毓奇爲漕運總督由內閣學士遷○丙寅吏部議覆御史李嗣奏散館改部人員請以到部之日爲始與各項期滿人員較年分淺深挨次題補應如所奏再查該部各項人員如何統較題補定例未有明文者並應一體辦理請嗣後各衙門主事缺出將學習期滿進士選拔貢生捐納議敘主事俱自

期滿奏留之日爲始庶吉士散館及見任小京官中式進士以部屬用並見任小京官由各該處奏明分部補用留部升用者俱自奏准到部之日爲始計其實在行走日期按題選各缺統較先後挨補又從前進士學習及議敘捐納人員有未滿三年先行奏留者亦扣滿三年方准與各項統較從之○戊辰諭稽古國學之制天子曰辟雍所以行禮樂宣德化昭文明而流教澤典至鉅也朕此次釋奠禮成念國學爲人文薈萃之地規制宜隆而辟雍之立自元明以來典尚闕如自應增建以臻美備著派禮部尙書德保工部尙書兼管國子監事務劉墉侍郎德成敬謹前往閱視度地鳩工諏吉興建落成之日朕將舉行臨雍典禮以昭久道化成之盛○己巳召李侍堯來京以畢沅爲陝甘總督圖薩布署陝西巡撫○庚午諭貝勒扎拉豐阿初封郡王後獲咎降爲公爵嗣因

伊甚知奮勉存封至貝勒後在內廷行走出力年久見在患病不能卽就痊可著加恩封爲多羅郡王賞戴三眼花翎以示矜恤○吏部以浙江知縣管嵩籍距本任過近奏請改銓命於五百里外對調毋庸另選著爲令○辛未 上啓鑾謁 泰陵 泰東陵○

免經過地方本年額賦十分之三○乙亥 上謁 泰陵 泰東

陵回鑾○辛巳 上閱健銳營兵○癸未 上還京師○乙酉諭

向來內外臣工每於萬壽慶節備物呈進今秋朕詣盛京道里較遠長途煩費更多未便本年萬壽貢物不必先期齋赴熱河呈進

○戊子諭朕披閱明臣奏議熊廷弼爲遼東經略時抒誠效命所

奏諸疏具見忠鯁而其時主閭政昏不惟不用其言轉致身罹重

辟深可憫惻因降旨查其見在有無子孫曾否出仕茲據舒常等

查奏熊廷弼後裔均以務農爲業惟次支之五世孫熊泗先業儒

人尙明白等語熊泗先著加恩以訓導用該督撫卽行咨補俟六年俸滿後如果堪膺民社再行保舉送部引見○移湖北襄陽鎮前營都司守備駐穀城

三月丁酉諭軍機大臣等蔡新自上年五月乞假回籍迄今將近一年此時自應起身來京供職近日身體精神若何殊爲廕念如此時尙未能起程不妨具摺陳奏以慰眷注朕近作君子小人論雲上于天解濮議辨錄寄閱看其中議論理解是否與聖賢經傳昭合至近日朝臣中詞章優贍者雖不乏人惟蔡新究心根柢猶能守其家學朕素所深悉蔡新接奉此旨如有所見卽行詳晰覆奏並著賜乳餅一匣隨旨發去 御製濮議辨曰濮議司馬光等以濮安懿王宜稱皇伯而歐陽修引禮云爲人後者爲其父母報則是雖出繼而其本生猶稱父母也光與修皆號正人而持論各

不相下迄未有折衷一是蓋嘗論之本生父母天性之親也子雖爲人之後聖人著之禮經曰爲人後者爲其父母報報者降服齊衰期也蓋服可降父母之名不可改所以明示天下爲萬世法也且人臣出繼爲人後者世所嘗有皆得推恩封其本生父母不改稱伯叔禮也天子以孝教天下而因出繼稱所生父爲伯叔是以帝王爲重而以父母爲輕可乎舜竊負而逃雖孟子強爲之辭然實有以見父母重於帝王也明興獻王之議張璁桂萼等阿諛逢迎力請去本生之號至稱爲皇考追諡帝號入廟苟以竊一時之利祿而不顧其君貽天下萬世之訾議其亦可謂最無忌憚之小人者矣予以爲爲帝王者苟不違君道以致見棄於天自無有無嗣旁支入繼之事苟有其事則必其身或其祖考有得罪於天之事卽所謂國家將亡必有妖孽而已然設萬一有其事何不稱所

生曰皇帝本生父歿則稱本生考立廟所封之國無國則於其邸第爲不祧之廟祀以天子之禮亦合父爲士子爲大夫葬以士祭以大夫之義則尊親之誼交盡而於公義私恩兩無遺憾何昔之議禮者未見及此而紛紛聚訟爲耶余因感司馬光歐陽修濮議之事以局外而觀局中爲之權衡斟酌期合夫天理人情之正因著濮議辨爲萬世旁支承統者有所折衷俾不致賢如司馬歐陽互爲水火邪如張璪桂萼爲夤緣捷徑而總歸於戒爲君者平時敬天愛民不至見棄於天嗚呼可不慎哉○以秦承恩爲四川布政使由陝西按察使遷○戊戌調王永爲陝西按察使以伊桑阿爲直隸按察使由清河道遷○庚子諭刑部議覆陝西省殺死一家六命兇犯趙成長子趙友諒次子趙進財俱照擬斬決原以此等兇惡之徒已絕人之嗣自不應復使其尙留餘孽固屬準情酌理罪所應得

但詳覈此案情節趙友諒因伊父欺姦伊妻卽行攜眷遷避及伊父犯案後復代爲認罪若按例真之重辟情又可憫然趙成殺死一家六命絕其後嗣殘忍已極若今因趙友諒情節可矜卽行寬釋是趙成淫惡兇犯轉得有後於情理未爲允協朕酌之情理著將趙友諒從寬免其死但改爲宮刑俟百日平復後再發遣烏嚕木齊以示法外施仁之至意至趙成之次子趙進財及幫同行兇之孫四俱著卽處斬○辛丑禮部侍郎錢載兵部侍郎錢士雲俱以年老休致○以朱椿爲兵部侍郎劉毅爲廣西巡撫由山西布政使遷○乙巳諭嗣後各省逆匪劫盜於審明後交按察使收禁奉旨後卽在省城正法其應梟示者傳首犯事地方著爲令○丙午以汪新爲山西布政使馮廷丞爲湖北按察使由江南鹽道遷○丁未以金士松爲禮部左侍郎由內閣學士遷○戊申諭據大學士公阿桂等奏報自

本月初一日開放新河後奔騰掣溜全黃已復故道直達歸海十三日辰刻挂纜堵合十四日辰刻金門一帶俱已斷流從此黃流順軌永慶安瀾等語此次曲家樓漫口爲民生運道攸關特命大學士公阿桂前往經理籌辦幾閱兩載因諭阿桂等於迪南一帶另籌去路經阿桂等公同酌於蘭陽一二堡至商邱七堡共一百七十餘里另築新隄疏挑引渠阿桂等原議本擬霜降以前完工開放而隄渠並舉需用人夫較多該地方督撫等屢請鄰省助夫非便屢經降旨訓諭並令展限緩至春間桃汛開放引河俾豫省夫役可以從容挑築停止他省撥派之煩阿桂等遵照辦理定期開放大溜全掣壩工堵合穩固此皆仰邀 天佑 神助幸得歲工朕欣感之餘益深虔敬在事諸臣辦理得宜均屬可嘉阿桂李奉翰何裕城李世傑著交部議敘並著加賞阿桂等荷包等物以

示優獎所有在工文武各員俱屬奮勉出力並著阿桂等查明分別等第咨部一併議敘至此次要工合龍全賴 河神默佑自宜益伸崇奉仰答 神庥卽照阿桂等所請將惠安觀鳩工重修以肅觀瞻而昭妥侑候朕親書扁額詩句發往懸挂用酬靈貺將此通諭知之○以江南沛縣上年水災命薩載親往履勘於高燥地方改建城垣○己酉諭吏部議處參革知州陳天桂原保各上司一本將調任廣西巡撫姚成烈議以革任升任廣西按察使富躬蒼梧道周廷俊均議以降調而聲明其同省與不同省所辦尙未允協卓異官員貪贓不法原薦各上司自有應得處分但須覈其犯贓年月若在原薦上司任內後雖離任不可謂無從揭參也自當查覈犯贓年月分別議處至各省保薦卓異官員俱係督撫藩司主政該管道府能持正不阿者少不過隨上司按例轉詳耳所

得處分亦應分別輕重著吏部酌覈定例另行詳晰妥議所有議處姚成烈等一本卽著俟定議後再行按照新例覈議具奏○諭昨召見詹事興桂見其年力已衰已降旨將伊原品休致此等三品京官每逢京察屆期吏部不過照例具本開列既不似各部院堂官時常接見又非如四品以下京堂特派王大臣驗看帶領引見者可比是衰庸者得以戀棧轉致有礙後進者升途非激敘官方之道嗣後京察時滿漢內閣學士副都御史仍著吏部照例開列具題外其餘大小三品京堂既不便派王大臣驗看俱著吏部一體帶領引見其履歷註明所有本年京察三品京堂卽照此例行○甲寅以趙鍊爲內閣學士○乙卯復揀選武進士舊例○以扎勒翰爲內閣學士

由光祿寺卿遷

巴忠由副都統松筠由員外郎遷

○庚申諭文綬年老著施恩令其自行來京

夏四月乙丑諭據剛塔奏郡王扎拉豐阿於四月初四日行抵要
亭子地方病故等語扎拉豐阿在內廷行走多年甚屬出力近因
患病朕令伊回游牧處調養以冀速痊詎意因病溘逝朕心深爲
軫悼若使伊柩由彼卽回游牧朕心實所不忍著加恩仍准進京
俟治喪事畢再著伊子丹巴多爾濟從容送回游牧丹巴多爾濟
年幼未諳事務著賞銀四千兩派內務府大臣金簡料理喪事著
丹巴多爾濟卽扶伊父柩緩行進東直門俟將近城門時派十七
阿哥迎至城外同至伊家賞奠茶酒從前已賞有陀羅被此時先
派御前侍衛豐仲濟倫前往迎奠並照料伊柩回京其應得卹典
著該部察例具奏○乙亥 上閱火器營兵○辛巳諭朕將次啓
鑾前往熱河秋閒卽由熱河至盛京恭謁 祖陵見在福隆安氣
體尙弱將來隨往之御前大臣乏人著福康安來京署理工部尙

書所有四川總督員缺著李世傑補授李世傑未到任之前四川總督印務著交特成額暫行署理福康安接奉此旨卽由驛起程務於五月二十四日啓鑾前到京河南巡撫員缺著何裕城補授李世傑交卸撫篆卽前赴新任不必來京請訓蘭第錫著署理河東河道總督印務卽著來京請訓再赴新任○刑部議覆大學士前署直隸總督英廉奏灤州民婦老王邢氏因伊媳小王邢氏身弱不能工作時加毆罵卽蓄意謀殺後因小王邢氏出言頂撞遂同無服姪媳王姚氏並女賈年姐將小王邢氏按倒用刀撻落門牙以鹽瀉向灌立時殞命請將王姚氏賈年姐依謀殺人從而加功律擬絞監候老王邢氏依故殺子孫之婦律擬杖一百流三千里不准收贖應如所題得旨此案姚氏賈年姐俱依擬應絞著監候秋後處決至老王邢氏與小王邢氏分屬姑媳該部覈擬照尊

長謀殺卑幼律問擬杖流不准折贖固屬照例辦理但覈其情節
尙未允協姑之於媳究與親生子女之於父母不同若平日不遵
教訓或有忤逆情形自應管教責處然亦不得任意陵虐恣行殘
忍今小王邢氏因身弱不能工作尙無大過乃老王邢氏因其出
言頂撞蓄意謀殺輒用鹽酒向灌並用刀撬落門牙兇殘已極若
不嚴加懲儆則凡爲姑者不論其媳有無忤逆竟恃尊長名分肆
意謀殺到官問擬又得倖邀寬減此風亦不可長老王邢氏罪雖
不至論抵然僅問擬杖流不足蔽辜老王邢氏著改發伊犁給與
厄魯特爲奴以示懲儆如此準情定罪則凡爲尊長者皆知慈愛
而爲卑幼者更得盡其孝敬庶不至恩義盡泯亦明刑弼教之一
端也嗣後如有此等案件卽著照此辦理○乙酉山東旱以明興
不親祈雨切責之○丁亥諭向例總督俱兼兵部尙書右都御史

銜巡撫俱兼兵部侍郎右副都御史銜但漕運河道總督並無地方之責究與各省總督不同况又有由道員升署及簡擢初任之員若一例兼銜未免太優不可不量爲區別嗣後漕運河道總督該部具奏請給與兵部侍郎右副都御史銜著爲令○己丑 上詣 黑龍潭祈雨

五月辛卯朔諭李奉翰擢用河道總督已逾數年且辦理河務尙屬奮勉著加恩仍兼兵部尙書右都御史銜漕運總督毓奇甫經擢用著照新例改授爲兵部侍郎右副都御史銜○癸巳定月選各官豫借養廉由各省報撥例○丙申調王站住爲四川布政使秦承恩爲湖南布政使○丁酉諭據李世傑奏豫省堵築青龍岡漫工及築隄濬渠歷次酌增夫料價值銀九百四十五萬三千九百餘兩請分作三十年攤徵以紓民力一摺豫省自辦理大工以

來恩次部撥又動用司庫銀千餘萬兩無非爲百姓保護田廬輯甯家室所有採辦物料雇募人夫俱於例價之外寬裕給值俾小民踴躍趨事以期迅速成工其例價外酌增銀兩自應分年均攤帶徵還款在百姓等依限輸將亦屬分內之事但此次爲數甚多而上次漫工案內又尙有攤徵未完銀九十餘萬兩若按年帶徵民力未免拮据朕自御極以來勤恤民依覃敷愷澤普免天下地丁錢糧者三次普免各省漕糧者二次不惜萬萬帑金俾閭閻共臻康阜又何靳此千餘萬庫項而令小民每年於正賦之外多此徵輸耶况見在仰荷上天孚佑大工告蒧自應廣澤推仁與斯民咸慶盈甯之福所有此次該撫等所請分年攤徵銀九百四十五萬三千九百二十餘兩以及上次攤徵未完銀九十四萬五千餘兩俱著加恩普行豁免以仰答昊蒼嘉貺並示朕愛惠黎元

爲民藏富主意該撫其徧行曉諭俾茅簷蔀屋咸使聞知均霑實

惠毋任不肖官吏從中滋弊該部卽遵諭速行○戊戌免甘肅三

十六年至四十六年帶徵錢糧○甲辰王杰丁憂以朱椿爲左都

御史調彭元瑞爲兵部右侍郎以吳垣爲吏部右侍郎由太常寺卿遷○

丙午諭協辦大學士吏部尙書永貴老成端謹練達精詳數歷中

外勤勞懋著雖近覺精力稍衰尙能照常辦事遽聞溘逝深爲軫

惜著派散秩大臣帶同侍衛十員前往奠醑其任內降革罰俸處

分俱予開復所有應得卹典著該部察例具奏尋予祭葬謚文勤

○丁未諭直隸總督袁守侗端重篤實才守兼優數歷中外宣力

有年簡任畿封正資倚畀近聞其病後痰喘未止屢經諭令加意

醫治昨復據奏請解任因命御前侍衛豐紳濟倫前往看視並諭

其安心調理以冀速痊今聞溘逝深爲軫惜著加恩晉贈太子太

保准入賢良祠所有任內降革處分俱予開復其應得卹典該部
察例具奏尋予祭葬諡清愍○以劉義爲直隸總督孫士毅爲廣
西巡撫○以陸燿署山東布政使俟服闋再行實授○以伍彌泰
爲吏部尙書協辦大學士由西安將軍遷○戊申諭朕披閱明史袁崇煥
督師薊遼尙能忠於所事而其時主闇政昏不能罄其忱悃以致
身罹重辟深可憫惻因降旨查其見在有無子孫曾否出仕茲據
該撫尙安查奏袁崇煥無嗣係伊嫡堂弟文炳之子入繼爲嗣見
有五世孫袁炳並未出仕等語所奏尙未明晰袁炳如果文理通
順卽照熊廷弼裔孫之例以訓導咨補俟六年俸滿察其堪膺民
社再行保舉送部引見如僅能麤曉字義人尙明白卽以佐雜等
官補用若未經讀書以務農爲業卽賞給八品頂帶榮身著該撫
查明遵照辦理具奏○己酉諭朕臨御以來祇畏寅恭凡遇 壇

廟大祀無不恪誠齋祓親詣行禮茲屆夏至 北郊於十九日
進宮齋戒適因氣滯舊患作痛見在令醫加意調攝尙未全痊誠
恐升降儀節有愆轉不足以昭誠敬此次朕卽在御園齋戒派皇
六子永琮敬謹恭代行禮若臨期氣體全安朕仍親往肅恭莅祀
○庚戌命署工部尙書福康安軍機處行走○壬子定祈雨陪祀
官員在公署齋宿例○甲寅 上啓鑾秋獮木蘭○免經過地方
本年額賦十分之三○庚申 上駐蹕避暑山莊

六月癸亥體仁閣災○甲子諭軍機大臣等昨據正藍旗都統奏
奉恩輔國公弘景差家人許鳴持諭往靜海縣收取馬廄地畝一
事係由直隸總督咨查戶部轉咨該旗此事實爲僅有該縣詳報
時該督自應一面具奏一面咨查乃袁守侗竟未奏及僅以咨部
了事計彼時袁守侗病勢已篤昏迷之際未能辦理及此使其平

日於此等應奏之事不行入告朕必當將伊交部嚴加議處矣直隸總督於旗民交涉事件最多必須秉公持正不避嫌怨方爲無負委任劉綏平素人尙質實是以加恩擢用伊在直年久於朕辦理庶務一秉大公至正自應深悉著傳諭劉綏嗣後遇王公大臣等有因地畝一切事件與地方官交涉者若不由戶部及木旗行文竟敢私自差人持諭前往無論其事之是非曲直該督卽行據實一面奏聞一面辦理毋得稍存瞻顧自干咎戾著將此旨存記俟劉綏到任時傳諭知之○丙寅諭和珅著施恩賞戴雙眼花翎○丁卯命改建浙江范公塘爲石塘○戊辰 上詣熱河 文廟行禮○丙子諭弘晷著革去奉恩輔國公並內大臣延恆著革去四品宗室頂帶交留京辦事王大臣會同宗人府刑部秉公嚴審定擬具奏○辛巳諭軍機大臣等據蔡新奏五月二十一日已抵

蘇州謹擬抵京後輕裝就道前赴熱河一遂傾向之誠等語已於
摺內批示矣前因天氣炎熱念伊年高之人往返勞頓曾傳諭留
京辦事王大臣於伊到後諭令遵旨不必赴熱河請安今蔡新瞻
觀之意既甚懇切見已改期於八月十六日啓鑾伊若於七月初
抵京卽帶領六月分月選官前來熱河引見如到京已過七月引
見之期卽於八月初帶領七月分月選官至熱河亦無不可不可
獨自束裝前來也將此諭知蔡新並諭留京辦事王大臣知之○
壬午諭弘晷於伊姪延恆令許鳴昌充家人捏造論帖赴靜海縣
私收地畝一事曾與許鳴見過兩次又令與延恆商同辦理經留
京辦事王大臣會同宗人府刑部審訊明確請將弘晷永遠圈禁
其罪固由自取第念延恆所寫札諭內言語究非弘晷授意令其
編寫若使札諭出自弘晷之手自當加倍治罪尙不止於圈禁今

訊明止於貪圖微利尙與授意者有間况今與朕同輩年稍長者
止弘最一人見在駐蹕熱河敬念 皇祖推 恩篤祐奕禩相承
前弘最因伊父緣事圈禁數十年之久尙且格外加恩釋放洊封
公爵今雖伊自取罪戾若照所擬永遠圈禁朕心實爲惻然弘最
著加恩仍授爲散秩大臣令其在家閉戶閒住不必當差行走著
留京辦事王大臣等傳諭令其痛自改悔安分守法以副朕格外
施仁之至意儻仍怙終不悛復罹法網不特弘最無顏見朕卽朕
亦自覺慚怍矣延恆依擬絞候著交宗人府嚴行圈禁照例辦理
許鳴依擬應絞著監候秋後處決○諭軍機大臣等弘最差家人
許鳴持諭至靜海縣查收地畝一案見已據留京辦事王大臣審
明定擬具奏矣至靜海縣雙窩村等處有弘最之父入官地畝共
一百九十三頃迄今徵租地僅有二十七頃其餘荒地至一百六

十五頃之多其故殊不可解此項地畝既經入官自應召墾徵租乃直屬向來陋習旗地一經入官卽多報荒此皆地方官假捏詳報以爲影射漁利之地最爲積弊亦不止此案也從前旗租拖欠經部議定有處分之後卽按季徵解不至拖欠况此項地畝當年未入官時若皆似此拋荒本人何以取租養贍可見從前報荒非地方官規避處分卽係借端捏報著交劉綬將靜海縣此項地畝徹底根究其荒棄者究有若干頃其餘各屬旗地報荒衝壓者亦一併查辦據實詳明覆奏至此案靜海縣知縣王鳳文於許鳴持札到縣時卽據實詳辦尙屬留心能事並著查明如荒地內該縣竟有情弊自當據實參奏若查無情弊卽出具考語送部引見將此諭令知之○癸未命伊犁綏定塔勒奇二城倉務照惠遠等城例派專員經理

東華續錄

臣王先謙

臣周潤蕃恭校

秋七月丁酉命各省大挑分發舉人以知縣佐貳分別補用○戊申以李慶葵爲河南布政使李廷揚爲江蘇按察使由廣東橫道遷○乙卯諭盛京爲王迹肇基之地朕御極以來敬惟祖宗開創艱

難佑啓萬年統緒於癸亥甲戌戊戌暨今癸卯四詣盛京恭謁祖陵以申積悃所愿川原形勝因見徵聞並爲詩以識而於太

祖太宗締造鴻規耿光大烈恭紀成篇實足以垂法守非僅託爲吟詠所有四詣盛京御製詩著皇子等分年按次各錄一分裝

成四卷彙貯一匣以昭觀揚垂裕之至意○諭據英廉奏近日病勢轉增急難痊愈懇請開缺等語英廉宣力年久倚毗方深自卧

病以來朕心甚爲廕念屢經降旨諭令加意調攝以冀就痊今以病勢纏綿陳請開缺情詞懇切英廉著以大學士在家專心養病不必開缺將來病痊時仍照舊入閣辦事大學士從前本有六缺卽多一人亦屬無妨見在內閣協辦之人蔡新著補授大學士梁國治著協辦大學士劉墉著補授吏部尙書其工部尙書員缺著金簡補授福長安著轉補戶部左侍郎諾穆親著調補戶部右侍郎其吏部右侍郎員缺著玉鼎柱補授所遺盛京禮部侍郎員缺著宜興補授

八月己巳命蔡新爲文華殿大學士兼吏部尙書○庚午賜達賴喇嘛玉冊玉寶敕曰國家海宇清晏民物敦甯撫育中外振興黃教自宗喀巴崇闡宗風宣揚梵律爾達賴喇嘛乃宗喀巴之法嗣根敦嚕布八轉世身也夙慧圓成性身常住十方供養華夏皈依

先是順治年閒五轉世達賴喇嘛來京瞻覲 恩禮崇隆自茲四
世咸傾心依向廣布教乘龍渥有加焉爾達賴喇嘛教演禪宗誠
殷率祝普天福壽永世吉祥誠國家道洽重熙休和之盛事也以
爾性體純全法圓廣布朕甚嘉焉茲特加殊禮錫之玉冊玉寶爾
其祇領供奉於普陀宗乘之廟永鎮法門逢國慶典用之章奏其
餘奏書文移仍用原印爾膺茲寵錫其益勵清修宏宣宗乘副朕
闡揚荒教福佑羣生至意以廣布爾前世達賴喇嘛之善緣壽世
福民用光我國家億萬年之休命欽哉○乙亥 上自避暑山莊
詣盛京恭謁 祖陵○免經過地方本年額賦十分之三○戊寅
以勒保爲兵部右侍郎琅玕爲內閣學士_{中郎}○庚辰諭太子太
保大學士英廉老成練達奉職恪勤翊贊綸扉總司讞典實心宣
力倚毗方殷春閒偶聞患病卽遣醫診視並屢經降旨諭令加意

調攝以冀就痊近因病勢轉增懇請開缺復降諭旨令其以大學士在家專心調養尙冀痊愈後仍照舊入閣辦事今聞溘逝深爲悼惜著派散秩大臣一員帶同侍衛十人前往奠醊並加恩入祀賢良祠仍賞給銀五千兩俾治喪事其任內降革罰俸處分均予開復所有應得卹典著該部察例具奏尋予祭葬諡文肅○廣東巡撫尙安奏遵旨訪查袁崇煥之五世孫袁炳鑑曉字義人尙明白應照熊廷弼裔孫之例以佐雜等官選補報聞

九月己丑朔 上駐蹕四堡子東大營閱射○庚寅以喜常爲內

閣學士

光祿寺卿

○癸巳

上駐蹕老邊大營閱射○朝鮮國王

李祘奉表修貢遣陪臣在盛京迎駕恭祝 萬壽命照例加賞並

賜 御製詩章○乙未免奉天府屬四十九年錢糧○戊戌 上

謁 永陵○己亥行大饗禮○閱興京城○免盛京戶部各莊頭

本年交倉糧石○免盛京等處旗地本年應納米豆草束十分之五○減奉天等處死罪免軍流以下罪○諭見在 永陵 福陵 昭陵所有下馬木牌俱著改用石碑鐫刻清漢蒙古西番回子五體字以昭我國家一統同文之盛○癸卯 上謁 福陵○甲辰行大饗禮 上謁昭陵○臨奠武勳王揚古利墓○敕諭襲封哈薩克汗杭和卓曰昨據駐紮塔爾巴哈台大員等具奏爾父阿布勒比斯病故朕聞深爲憫惻爾父阿布勒比斯自歸附以來深感朕恩約束遊牧屬人於邊禁偷盜等案盡力妥辦朕甚嘉獎今聞溘逝殊堪憫惻朕特施殊恩令伊犁將軍由彼處派大臣前往祭奠爾父爾杭和卓係阿布勒比斯長子加恩將爾父汗爵令爾承襲今將襲封敕書並大段四匹一併發往爾平素善能協助爾父辦理遊牧事務朕亦深知今爾襲爵應感朕恩留心約束屬人

在邊遊牧駐紮之哈薩克等照例俱令遠移勿致偷盜滋事爾兄

弟務須友愛鄰境部落永宜和好勿隱別部逃竄之人如有公事

惟秉公稟伊犁將軍塔爾巴哈台大臣等轉奏萬勿希利取巧爾

果於一切事務知感朕恩留心辦理謹慎遵行朕必倍加恩澤杭

和卓奉到敕書祇領段匹一切惟務實心奮勉以期永受朕恩欽

哉○乙巳行大饗禮 上詣盛京 太廟行禮閏奉安 五朝冊

寶○廣盛京及奉天學額○改盛京大清門兩旁下馬木牌爲石

牌並鐫五體文字○ 上駐蹕盛京○丙午 上臨奠克勤郡王

岳託墓○丁未 上臨奠宏毅公額亦都直義公費英東墓○戊

申 上御崇政殿受慶賀○己酉 上詣 清甯宮祭 神○庚

戌 上回鑾○甲寅以陳步瀛爲山西按察使由甘肅調○乙卯

上詣 北鎮廟行禮○諭軍機大臣等朕明歲南巡一切行營

供頓俱豫期頒發帑金該督撫備辦從無絲毫擾累閭閻但恐各督撫不能仰體朕意致滋糜費如見在盛京途次見有搭蓋買賣街席棚卽此一節亦屬多事隨從官員人等其日用所需聽其自便每歲木蘭行圍何嘗官爲豫備並未缺少食物且添此席棚恐差使過後屬吏冒濫開銷在所不免朕明春巡幸自直隸以至浙江著傳諭各該督撫不得隨營豫備買賣街支搭棚廠以省無益之費至此次令阿哥等隨行者原欲其隨侍左右知朕年逾古稀未嘗少懈而扈蹕諸大臣亦皆恪恭敬事管束嚴明令阿哥等觀看之意也該督撫等務須循照上數次之例辦理差務行所無事總以節儉爲主不得因有阿哥隨行稍爲添設豫備再各省鹽政織造關差皆係內務府世僕知公主隨行係朕所鍾愛閒進衣服食物以博朕歡殊不思服食玩好宮中何物不有豈藉外間呈進

著一併傳諭飭禁伊等係內務府人員尙不許其稍有進獻至督撫爲封疆大吏又何得效尤及此耶將此傳諭知之○戊午諭朕閱館臣所進職官表志詹事府一門其按語內稱詹事爲東宮官屬我國家萬年垂統家法相承不事建儲冊立詹事府各員留以備詞臣遷轉之階等語是書館臣因朕前降諭旨於建儲一事之斷不可行明切訓示故於按語內特爲揭出其實書生拘迂之見豈能深計及此且使是書留傳後世安知不又訾議館臣爲無奈迎合諭旨非其本懷耶用是不得不再爲明白宣諭夫堯授舜舜授禹唐虞固公天下卽禹之傳啓亦非於在位時有建立太子之事三代以後人心不古秦漢豫立太子其後爭奪廢立禍亂相尋不可枚舉逮而唐高祖立建成爲太子至於兄弟相殘建成被害近而明神宗朝羣臣奏請豫立國本紛紜擾亂大抵皆爲後來

希榮固寵之地甚至宵小乘閒伺釁釀爲亂階如梃擊等案神宗
召見太子泣爲慰藉父子之間至於如此閱之真可寒心可知建
儲冊立非國家之福召亂起釁多由於此卽以我朝而論 皇祖
時理密親王亦嘗立爲皇太子且特選公正大臣如湯斌者爲之
輔導乃旣立之後情性乖張卽湯斌亦不能有所匡救羣小復從
而熹惑遂至屢生事端上煩 皇祖聖慮終至廢黜且理密親王
幸而無過竟承大統亦不過享國二年其長子弘皙縱欲敗度未
克幹蠱年亦不永使相繼嗣立不數年間連遭變故豈我大清宗
社臣民之福乎是以 皇祖有鑒於茲自理密親王旣廢不復建
儲迨我 皇祖龍馭上賓傳位 皇考紹登大寶十三年勵精圖
治中外肅清 皇考敬法 前徽雖不豫立儲位而於宗社大計
實早爲籌定雍正元年卽 親書朕名緘藏於乾清宮正大光明

扁內又另書密封一匣常以隨身至雍正十三年八月 皇考升
遐朕同爾時大臣等敬謹啓視傳位於朕之御筆復取出內務府
緘盒密記數對照合人心翕然此天下臣民所共知者也朕登極
之初恪遵 家法以皇次子乃 孝賢皇后所生嫡子爲人端重
醇良依 皇考之例曾書其名藏於乾清宮正大光明扁額後乃
稟命不融未幾薨逝遂命大學士鄂爾泰張廷玉將其名撤出追
諡爲端慧皇太子是未嘗不立嫡也但不以明告衆耳嗣後皇七
子亦 孝賢皇后所生秉質純粹深愜朕心不久亦卽悼殤其時
朕視皇五子於諸子中更覺貴重且漢文滿洲蒙古語馬步射及
算法等事並皆嫻習頗屬意於彼而未明言乃復因病旋逝設依
舊生之見規倣古制繼建元良則朕三十餘年之內國儲凡三易
尙復成何事體是以前於癸巳年復書所立皇子之名藏於匣內

常以自隨是年 南郊大祀令諸皇子在 壇襄事會以所定皇
子默禱於 上帝若所定之子克承堂構則祈 昊蒼眷佑俾得
年命延長儻非 天意所屬則速奪其算朕亦可另爲選擇毋誤
我國家宗社生民重寄本年恭詣盛京祇謁 祖陵亦如告 天
之言默祝於 太祖 太宗之前仰祈 靈爽式憑永垂昭鑒朕
非不愛子也止以宗社爲重若朕之子孫皆以朕此心爲心實大
清國億萬斯年之福也今日召對諸皇子及軍機大臣面降此旨
卽朕前所默告 上帝 祖宗之言豈容有絲毫虛飾耶朕於天
下一切庶務無不宵旰勤求悉心籌畫甯於繼體付託之重轉不
早爲定計乎秋間朕於避暑山莊河岸御槍打鵝鵲失足落水溼
衣其時不特御前王公大臣等聞知俱卽趨至問安卽漢軍機大
臣接踵前赴該處朕仍率伊等談笑而行並未有因內廷禁地太

監等敢於阻止者設朕起居偶有違和大臣等俱可直詣寢所此
皆由朕平日君臣一體無日不接見諸臣面承諭旨何至有若前
代夜半禁中出片紙之語爲杞人之憂乎總之建儲一事卽如井
田封建之必不可行朕雖未有明詔立儲而於天祖之前既
先爲齋心默告實與立儲無異但不似往代覆轍之務虛名而受
實禍耳故見在詹事官屬雖由舊制而其實一無職掌止以備員
爲翰林升轉之資耳因再明切宣諭我子孫其各敬承勿替庶幾
億萬年無疆之休其在斯乎總之此事朕亦不敢必以爲是其有
欲遵古禮爲建立之事者朕亦不禁俟至於父子兄弟之間猜疑
漸生釀成大禍時當思朕言耳並諭館臣將此旨冠於是編之首
俾天下萬世咸知朕意

冬十月辛酉命黃河沿隄種柳申禁近隄取土○癸亥諭晉省刑

名案件繁多近來辦理多有未協必須熟諳刑名之員方克勝任
所有山西按察使員缺著長麟補授陳步瀛著仍留蘭州道任福
建興泉永道員缺著李廷揚補授江蘇按察使員缺亦屬緊要著
琅玕補授著卽各赴新任不必來京請訓蔡學溥見在交部嚴加
議處例應降調所遺蘇松糧儲道員缺著納清額補授○諭琅玕
所遺內閣學士兼禮部侍郎員缺著伯興調補其所遺盛京兵部
侍郎卽著宜興暫行兼署奉天府府尹事務著鄂寶兼管○甲子
上詣 北海神廟行禮○丙寅命覺羅官員不必在奏事處行
走○壬申 上謁 昭西陵 孝陵 孝東陵 景陵至 孝賢
皇后陵奠酒回鑾○乙亥 上還京師○諭朕歷覽前代建儲諸
弊及我朝 家法相承於立儲一事之不可行已明降諭旨宣示
中外至史冊所載因建立儲貳致釀事端者不可枚舉自當勒成

一書以昭殷鑒著皇子等同軍機大臣及上書房總師傅等將歷代冊立太子事蹟有闕鑒戒者採輯成書陸續進呈卽著皇孫等之師傅爲膳錄書成名爲古今儲貳金鑑○前任湖北按察使汪新以賄屬頂兇重案不能究出實情率行審轉降三級調用○以范宜清爲盛京兵部侍郎由太僕寺卿遷○以李天培爲山西布政使由廣東按察使遷○已卯宗人府議處宗室明定貪利妄控請旨照例圈禁

一年得旨依議上年加恩宗室一體給與四品頂帶原所以示優眷而昭勸勵今明定乃貪利妄控實屬不知自愛若僅照例圈禁一年無以示儆明定著革去頂帶嗣後宗室有似此犯圈禁之罪者卽著革去頂帶著爲令○辛巳漕運總督毓奇奏請江淮衛守備李仁仍留本任諭以留任之日爲始五年後方予升轉嗣後各省奏留文武官員俱照此辦理○癸未諭國史之脩所以彰善癉

惡信今傳後我國家凝承 景貺垂裕萬年前曾降旨將開國以
來王公大臣及在朝滿漢文武內自卿貳以上外自將軍督撫提
督以上並綜覈生平實蹟各爲立傳蓋因前代諸史皆由後世史
官編纂勝朝事蹟歷年久遠湮沒失傳以致網羅散佚采及稗官
稗譏好惡任意軒輊率無定評何如及早裒集免致聞見失真傳
疑襲誤乎茲國史諸臣列傳進呈皆經朕親覽詳加覈定公是公
非不少假借以期徵實傳信但國史體例與歷代史不同館臣纂
輯惟應據事直書毋庸分別各門至若忠烈廉孝以及奸臣宦官
歷代皆附入列傳我朝百代昇平並無此等事也惟貳臣傳一門
前經降旨另編甲乙乃我朝開創所有此實扶植綱常爲世道人
心之計自應另立專門以存直道至叛逆之臣如吳三桂等亦應
明正罪狀另立一門用昭斧鉞之嚴所有見辦滿漢臣工表傳及

宗室王公表傳蒙古王公事蹟其在乾隆四十年以前者俱著該總裁等董飭纂修等官速爲纂辦勒限五年陸續進呈候朕欽定成書頒行並寫入四庫全書垂爲信史至該館採錄事實向俱恭照實錄紅本覈實記載第自雍正八年設立軍機處以來五十餘年所有諭旨批奏事件未經發鈔者尙多著先將乾隆四十年以前軍機處所存檔案令該館總裁纂修等詳晰查閱裒輯以昭覈實○乙酉諭刑部議駁四川總督李世傑條奏川省禪刀殺人請照烏槍殺人例治罪之處毋庸議一摺所駁甚是已依議行矣禪刀不過金刀中之一類前因金刃傷人較手足他物爲甚降旨內外問刑衙門於秋審時數其情近故殺者列入情實嚴示創懲以期辟以止辟若以禪刀比照烏槍槩從故論則小刀菜刀等類亦可殺人何能逐物定例致滋繁擾况該省禪刀等項原非日用

應有之具本宜嚴禁該督如果督飭府州縣實力嚴查將各該州縣城市店鋪私行打造售賣之處重加懲治遇有攜帶禪刀案犯卽照匪徒辦理此等兇器不但不銷毀淨盡如此方爲正本清源又何必多立科條以致故殺本律轉多淆濶乎此奏朕初以李世傑爲戢除兇暴起見所言似爲近理批交部議部臣並不因批示有意迎合卽切實指駁今閱所駁於情理實爲允協應依議行朕斷不肯因有嘉獎之批稍有迴護朕辦理庶務鑑空衡平惟求其理之是從不稍存成見各部院堂官皆朕倚任之人當仰體此意遇事各抒所見不可略有瞻顧至司員中亦當如此實心辦事務求事理之平不可迎合堂官爲堂官者亦當虛心採擇我君臣如此虛心集益則庶事何患不理政治何患不當耶朕臨御四十八年以來諸弊肅清萬幾就理皆一秉大公至正不肯稍存意見各

內外大臣其敬體朕懷交切勉勵以副朕孜孜求治諄切訓誡之意將此通諭知之○丙戌以誠親王弘暢承修 泰東陵工程數年卽須補修降爲郡王

十一月己丑軍機大臣議准四川成都將軍特成額奏平定兩金川後該處降番就近安插八年以來該降番等久沐深恩各安耕作遇有差遺莫不奮勉出力無異內地民人懇准改土爲屯除去降番名目又稱降番等生齒日繁男婦約計九千餘名口應設專員管理請令懋功協中軍都司與綬靖營遊擊就近彈壓仍飭懋功協副將統爲控制其錢糧命盜案件歸美諾同知辦理該營員不許越俎干與從之○乙未調福甯爲安徽按察使以陳步瀛爲甘肅按察使

由肅州 ○己亥諭本日句到朝審官犯內如國棟身任浙江藩司於陳輝祖抽換抄產私易金兩一案其罪在於扶同

徇隱並不據實陳奏究未分肥入己且屬員畏懼上司亦係外省積習尙屬可寬是以未句並著加恩釋放俟有新疆換班廢員缺出令其前往效力贖罪至王士潯楊仁譽隨同陳輝祖抽換舞弊私改印冊且侵用官物入己贓私俱在千兩以上其罪較國棟輕重懸殊本應予勾但該二犯與國棟同屬一案國棟已邀寬典若將該二犯正法恐外間無識之徒以朕爲偏護旗員是以王士潯楊仁譽亦俱免其勾決該二犯情罪本重將來雖遇恩赦不准援免又蘇隆阿常清安臨三犯因禁地失火疏虞出於意外且並未延燒今已圈禁一年免其勾決著加恩釋放回旗又金蟾桂鄭瑞蘇泰三犯於臺灣刁民聚眾強搶仇殺重案不卽逃遁擒拏因循貽誤固屬玩誤但究與失陷城池者有間亦著免勾又劉得一犯由陸路出身洊升水師遊擊巡洋阻風不諳水師畏葸觀望尙未

貽誤地方亦著免勾又如明亮巴林泰舒成富通四犯富通袒護
要犯竟敢私行寬釋永遠枷示之重犯釀成重案舒成受富通屬
託欺蒙明亮又有侵蝕查抄贓私在千兩以上入己俱無可寬至
明亮被舒成蒙混致罹重罪所有金兩訊未入己且見交圖思義
查奏是以暫緩勾決巴林泰受富通屬託罪止贍徇迴護是以未
勾以上各情節朕詳閱招冊細加察覈苟其人有一縷可生之路
無不量爲寬貸以體上天好生之意朕臨御四十八年以來矜
愼庶獄務期明刑弼教辟以止辟於秋讞大典詳閱各案犯招冊
一秉大公至正鑑空衡平生死總視其人之自取從不稍存畸重
畸輕之見如本日遇勾到朝審案犯寅刻卽起焚香告天齋心
自矢不肯有意從寬屈法施仁多活一人以爲積陰功起見又豈
肯多殺一人有意從嚴耶所有本日已勾未勾各犯除照例分別

榜示外並將辦理緣由明切宣諭中外知之○庚子以明春南巡命截留江南浙江漕糧各十萬石於水陸駐蹕地方分廠平糶○丁巳諭錢琦年力已衰著以布政使原銜休致卽令回籍

十二月庚申 上幸皇史宬○命臺灣總兵道府五年任滿更調

著爲令○乙丑諭朕恭閱康熙三十三年 聖祖實錄禮部奏祭

奉先殿儀注將皇太子拜褥設置檻內 上諭尙書沙穆哈曰

皇太子拜褥應設檻外沙穆哈卽行奏請 諭旨記於檔案經

聖祖降旨交部嚴加議處部議革職一事禮臣安設拜褥未協旣

經 聖祖面諭業已遵奉移設乃沙穆哈胸中卽豫存畏忌皇太

子之見奏請 諭旨記檔以爲日後卽責地步我 皇祖洞燭其

隱將伊革職以 皇祖之仁慈大度皇太子維時年幼尙無縱恣

事蹟禮臣因關繫儲貳卽心懷顧忌如此厥後日漸失德致遭黜

廢夫仁如 聖祖冊立儲貳猶致有理密親王之事設後之人主

未能如 聖祖之慈愛明哲而爲太子者又不能小心謙謹必致

漸生嫌隙鮮有能始終獲保萬全之理可見建儲冊立之斷不可

行也在書生拘墟之見必有竊議其非而後之人不思深慮遠仍

踵前轍或起事端彼時當益信朕言之早經灼見耳前經朕疊頒

諭旨明切曉諭並令皇子及總師傅軍機大臣等編輯古今儲貳

金鑑垂示久遠因恭閱 皇祖實錄禮臣安設拜褥請 旨記檔

卽此一事益可見朕所慮之不爽並令編入古今儲貳金鑑卷首

○諭鄭源璫著調補山西布政使其廣東布政使員缺卽著李天

培調補李天培於途次不拘何處接奉諭旨卽赴新任不必來京

請訓○庚午諭各部院司員升調別處奏留原衙門行走之例業

經降旨停止因刑部爲刑名總匯理藩院有蒙古事件必得熟悉

經降旨停止因刑部爲刑名總匯理藩院有蒙古事件必得熟悉

經降旨停止因刑部爲刑名總匯理藩院有蒙古事件必得熟悉

之員是以准其仍兼行走但思奏留人員內如京堂翰林等官本
係閒曹兼各部院行走尙無關礙至科道有剝劾之責未便令其
仍兼各衙門辦理司員事務卽刑部理藩院之熟悉部務司員本
部留以辦事有何不可何必又送科道博升職之虛名滋掣肘之
浮議乎嗣後刑部理藩院亦概不准兼科道其果能始終出力該
堂官據實奏聞帶領引見候朕以四五品京堂酌量補用仍可兼
部行走○甲戌以成策爲盛京工部侍郎由副都統還○是歲朝鮮來
貢○會計天下民穀數各省通共大小男婦二萬八千四百三萬
三千七百八十五名口各省通共存倉米穀四千一百三十四萬
九千八百三十一石五斗九升二合二勺

東華續錄

乾隆九十九

臣王先謙敬編

臣周潤蕃恭校

乾隆四十九年甲辰春正月庚子諭皇長孫絳德前因與革職禮部郎中蔡雄發往來餽遺書畫革去承襲定郡王嗣復加恩封爲公爵絳德爲皇長子定安親王嫡長子係朕長孫設如書生拘迂之見若明洪武時懿文太子旣歿劉三吾建議謂皇孫世嫡禮宜承統洪武泥於法古遂立建文爲皇太孫其後釀成永樂靖難之變禍亂相尋臣民荼毒皆劉三吾一言喪邦之所致也朕惟深鑒於歷代建儲之失是以再三宣諭並令纂輯儲貳金鑑一書爲萬世法戒若如洪武之泥古立儲封建以祖宗神器之重輕爲付託豈我大清宗社萬年之福乎今念絳德之子奕純新歲可以得

東華續錄

乾隆九十九

子朕慶抱元孫五世一堂實爲古稀盛事自應特沛恩施以衍奕
禩雲初之慶絲德著加恩晉封固山貝子嗣後宜益加謹飭常存
敬畏以期永承恩澤副朕諄切訓勉之至意此旨並著入於儲貳
金鑑○辛丑諭軍機大臣等據伊齡阿奏倣照安福艦樣式新造
寶蓮航御舟一隻見已工竣擬送至直隸廠豫備乘坐等語又多
一事覽奏不爲欣悅已於摺內批示矣朕自辛未以後五次南巡
乘坐安福艦甚爲安適此次南巡上年冬閒業令長蘆鹽政將御
舟送至直隸廠豫備舟中向列御筆詩章今若改乘伊齡阿所造
之舟豈竟將安福艦內御筆移挂耶抑另行特製耶伊齡阿小有
聰明每每高興取巧朕屢加訓飭仍不知悛改復作此無益虛糜
之舉著傳旨嚴行申飭况伊齡阿成造此舟必非自捐廉俸不過
交與商人承辦若此事該鹽政先行奏聞朕必諭令停止今業已

製造完竣止須將此舟停泊揚州候朕經過時閱看不可送至直隸廠豫備將此傳諭知之○癸卯諭軍機大臣等前據伊齡阿奏倣照安福艦式搆成造寶運航送至直隸廠豫備乘坐一摺已降旨嚴行申飭並傳諭該鹽政必不可將此舟送至直隸廠矣昨復將所進船式取進閱看船身笨重內河駕駛尤多不便朕自辛未以後五次南巡乘坐安福艦甚爲安吉況安福艦之外又有翔鳳艇豫備乘坐已極便適至御舟之後尙有內廷皇子等乘坐及豹尾槍各項近御差使船今若復添此舟內河行走勢必在眾船之前不免遲滯況添設一船水手河兵人等又須另有添設其一切工價犒賞等項更多糜費將來安置何處又須另建船塢種種不便竟全未計及總之伊齡阿小有聰明每高與取巧經朕屢加訓飭不知悛改且此船亦非伊齡阿自捐廉俸不過虛糜商力意

在獻勤作此無益之舉甚屬非是伊齡阿著再傳旨嚴行申飭並諭令將此舟仍遵前旨止須停泊揚州候朕經過閱看斷斷不可送至直隸廠豫備如未經接奉前旨業已牽挽北上亦必遵旨趕回具奏將此傳諭知之○丁未 上啓鑾南巡命 皇十五子同皇十一子永理 皇十七子永璘隨駕○免直隸山東經過地方本年額賦十分之三○戊申免直隸順天等十二府州屬通賦○甲寅尙安丁憂調孫士毅爲廣東巡撫以吳垣爲廣西巡撫調彭元瑞爲吏部右侍郎金士松爲兵部右侍郎以陸費墀爲禮部侍郎○丙辰諭前據永德奏廣東鹽商派捐公費一案因降旨令福康安前往查辦茲據奏查訊此案大槩情形一摺於總督巴延三雖未據審有染指分肥情事但巴延三身任總督於此等商總派累亦照積弊辦理並未據實奏明顯有迴護其咎已無可辭且

爲人拘懦難勝繁劇若仍留總督之任將來辦理諸事必多貽誤
巴延三著來京候旨兩廣總督員缺著舒常調補其湖廣總督員
缺著特成額補授舒常接奉此旨卽著交印馳赴新任不必來京
請訓舒常未到任之先兩廣總督印務著承德暫行署理其湖廣
總督印務特成額未到任之先卽著舒常就近交伊星阿暫行兼
署

特成額由成
都將軍遷

○免山東利津等二十一州縣衛逋賦

二月庚申

御製濟水考曰濟爲四瀆之一禹貢導沅爲濟以至

會汶入海不過八語而窮源至委昭垂千古爲不易之恆流向嘗
賦四瀆詩雖加考證止以漢志及水經注鄺道元李滌輩各持己
見究之其身並未歷其地尊耳食而相齟齬蓋因濟流伏見原無
定是以展轉紛歧無足怪者卽如禹貢所云入於河者非濟之清
流入黃也蓋卽伏於黃之底所謂入也溢爲滎則又見而出爲滎

地志所謂卽滎波之滎見豫州者三伏三見此其一證然其伏見原亦無定處而無定數也東出陶邱則今之曹州又至於荷則今之荷澤縣蔡沈所謂濟陰縣自有荷派也又東北會於汶汶自有源宋樂史所云清河卽今之大清河唐李賢所謂濟水東貫滑曹鄆青以入於海者也是則濟之源委實不出禹貢數語以解之者愈多而考之者愈繁乃致人但知大清河而反不知濟遂若靈瀆有不可復求者然蓋嘗論之禹貢所言乃本然之形勢今則時代變遷伏見靡定亦理之所必有而以禹貢八語證之總不出敷土奠川之本來其紛然口舌之論偶藉以資多聞亦可卽付之不求甚解亦可○辛酉諭州縣因公按法責斃所屬人役毋庸議以奪職著爲令○壬戌 上至泰安府詣岱廟行禮○乙丑諭前歲堵築青龍岡壩工時漫水業已斷流旋因西壩陡墊大溜下注河

道總督李奉翰在工竭力搶護以致跌入金門被纜格傷若非有
人拯救幾至殞命該督以總河大員身先督率經此危險實堪嘉
尙從前薩載因辦理陶莊引河甚爲出力曾經賞給騎都尉世職
今李奉翰前來行在接駕朕軫念前勞宜膺懋賞李奉翰著照薩
載之例加恩賞給騎都尉世職以示優眷○丙寅 上謁 少昊
陵至曲阜謁 先師孔子廟○丁卯釋奠 先師孔子○謁 孔
林酌酒○謁 元聖周公廟行禮○壬申免江甯蘇州安徽各屬
通賦○李本卒以永保爲貴州巡撫調李慶棠爲江蘇布政使以
江蘭署河南布政使俟服滿實授○癸酉除江蘇吳縣公田額徵
留備公用米○戊寅 上渡河祭 河神○廣江蘇安徽浙江科
試學額○減江蘇安徽浙江三省軍流以下罪○壬午免江南江
甯蘇州浙江杭州等附郭諸縣本年地丁錢糧○甲申免兩淮竈

戶四十五年四十六年通賦○以朱珪爲內閣學士

由少詹事遷

三月丙戌朔祭江神上渡江幸金山○丁亥上幸焦山○

調周煌爲左都御史

由兵部尚書調

○戊子諭福康安永德奏查辦粵東

鹽商派捐公費分別定擬一摺已批交留京辦事王大臣會同該部議奏矣此案前據譚達元呈控後朕卽疑有藉端派斂等事是以特命福康安永德先後馳赴粵東查辦今據福康安徽底查明巴延三於公費一項雖別無侵漁等事而因循積弊任聽該商等派捐公費採買土物據爲己之貢物情弊顯然向來各省督撫備貢土物杼枕以聯上下之情原所不禁在本人惟應將廉俸所餘自行置備派令屬員代辦尙且不可而況商人乎卽不進貢有何不可乃粵省自二十四年立總商以後竟公然派令商人私捐公費津貼價值已屬有干例禁該督等又擅爲己物進貢並未明奏

以致積弊相沿竟成派累尤屬不成事體今據該商等呈出貼補公費清單歷任總督俱用銀自三萬餘兩至五萬兩不等而楊景素在任未及一年竟倍用至六萬餘兩之多其借端勒索侵貪入己更出情理之外今楊景素等業已身故姑免深究所有歷任總督等派捐銀兩自應令其照數繳出解交浙江省以備海塘應用又福康安等另摺所奏商人幫辦物件一事請俟一二年後商力充裕督臣代爲奏進貢物等語此奏更爲不可商人等承領帑項營運交課不過微末之人原不得越分進呈貢物近如兩淮浙江長蘆商人間有豫備行宮等事亦因省方問俗經過該處疊沛恩施該商等自抒忱悃是以准其呈進豫備仍優加恩賚其獲利均不啻數百倍徒粵東商人本無此等事自不必援以爲例即使資藉官鹽營運獲利商力益得寬裕亦藏富於民之道且各省商人

有因偶值軍需公捐者無不交部議敘廣東亦曾有其事也儻將來該省附近等處設有地方公事需費該商等所獲盈餘積累日久報效便民之事該督等彼時再據情奏聞亦無不可所有福康安等所奏督臣代進貢物之處竟應議駁將此通諭中外知之○己丑諭兵部尙書員缺著王杰補授仍著在籍守制俟服滿來京供職王杰未到任以前所有兵部尙書事務卽著劉墉兼署○庚寅諭軍機大臣等前郝碩迎赴行在接駕經朕召見該撫於本省地方事務一無建白其屬員賢否亦僅於朕詢及時塞責登答無所可否旋因該省尙有逆書之案令其回任伊卽於眾中送駕嘿然而去郝碩係封疆大吏如此舉動於地方事自有廢弛著傳旨申飭本不值賞給詩章特以此次隨行各督撫俱會製詩頒賞所賜郝碩之詩亦一例書就朕之詩翰未便存而不論是以仍行賞

給該撫宜自知分量不可以倖邀寵賜自矜得意嗣後辦理公事應倍加勉勵實力振作儻仍似前番舉動以致地方有廢弛之處恐該撫獲咎茲深也將此諭令知之御製詩一併發往○辛卯

上幸蘇州府○壬辰免湖北江夏等二十四州縣衛三十年至四十四年逋賦○乙未 上詣 文廟行禮○丁酉再免浙江杭州

嘉興湖州三府屬本年額賦十分之三○己亥 上幸海甯州詣

海神廟行禮○以福建欽賜進士郭鍾岳年居一百四歲來浙迎 鑒賞國子監司業銜○庚子 上幸尖山觀潮閱視塘工○

辛丑 上幸杭州府○諭浙江建築石塘所以保障民生關係甚重前庚子南巡時朕親臨閱視指示機宜於老鹽倉舊有柴塘後一律添建石塘四千二百餘丈次第興修於上年七月間告竣因其砌築堅整如期蒞工原欲將該督撫及承辦文武官員交部分

別議敘今抵浙後親臨閱看乃所辦工程不惟不應邀敘並多未
協之處蓋朕於老鹽倉添建石塘固以衛護民生亦因浙省柴薪
日益昂貴歲修柴塘採辦薪芻致小民日用維艱是以建築石工
爲一勞永逸之計庶於閭閻生計有益然石塘旣建自應砌築坦
水保護塘根乃陳輝祖王亶望並未籌畫及此而後之督撫亦皆
置之不論惟云柴塘必不可廢此乃受工員懇懇爲日後歲修冒
銷地步況朕添建石塘原留柴塘爲重門保障並未令拆去柴塘
前降諭旨甚明也若如該督撫所言復加歲修又安用費此數百
萬帑金添築石塘爲耶又石塘之前柴塘之後見有溝槽一道見
有積水並無去路將來日積日甚石塘根腳勢必淹浸滲漏該督
撫亦並未慮及又石塘上有堆積土牛甚屬無謂不過爲適觀起
見無當實際設果遇異漲又豈幾尺浮土所能抵禦耶所有塘工

土牛卽著填入積水溝槽之內仍將柴塘後之土順坡斜作止須露出石塘三四層爲度並於其上栽種柳樹俾根株蟠結塘工益資鞏固如此則石柴連爲一勢卽以柴塘爲石塘之坦水且令柴塘亦時見其有坦水也總之見在柴塘不加歲修二三十年可保安然無事卽如范公塘尙歷多年況此歷年添建工程更無不堅實耶至范公塘一帶亦必須一律接建石工方於省城足資永遠鞏護著自新築石塘工止處之見作柴塘及挑水段落起接築至硃筆圈記處止再接築至烏龍廟止亦照老鹽倉一帶作法於舊有柴塘土塘後一體添築石塘將溝槽填實種柳並著撥給部庫銀五百萬兩連從前發交各項帑銀交該督撫據實覈算分限分年董率承辦工員實力堅築仍予限五年分段從東而西陸續修築俟工程全竣後朕另行簡派親信大臣閱看收工以期海疆永

慶安恬民生益資樂利該部卽遵諭行○癸卯 上詣聖因寺恭

瞻 聖祖仁皇帝神御行禮○閏杭州駐防兵○丙午賜浙江福

建召試諸生張師誠等四人爲舉人授內閣中書○戊申 上閱

福建水師○己酉 御製南巡記曰舉大事者有宜速而莫遲有

宜遲而莫速於宜速而遲必昧機以無成於宜遲而速必草就以

不達能合其宜者其惟敬與明乎敬者敬天明者明理敬天斯能

愛民明理斯能體物千古不易之理也予臨御五十年凡舉二大

事一曰西師一曰南巡西師之事所爲宜速而莫遲者幸賴 天

恩有成二十餘年疆宇安晏茲不絮言若夫南巡之事則所爲宜

遲而莫速者我 皇祖六度南巡予藐躬敬以法之茲六度之典

幸成亦不可以無言我 皇祖蕩蕩難名予藐躬瞻乎景仰述且

弗能作於何有然而宜遲莫速之義則不可不明示予意也蓋南

巡之典始行於十六年辛未是卽遲也南巡之事莫大於河工而辛未丁丑兩度不過敕河臣慎守修防無多指示亦所謂遲也至於壬午始有定清口水誌之諭丙申乃有改遷陶莊河流之爲庚子遂有改築浙江石塘之工今甲辰更有接築浙江石塘之諭至於高堰之增卑易顛徐州之接築石隄並山並無不籌度咨諏得宜而後行是皆遲之又遲不敢欲速之爲夫臣之事君其有知不可而強諍者鮮矣河工關繫民命未深知而謬定之庸碌者惟遵旨而謬行之其害可勝言哉故予之遲之又遲者以此而深懼予之子孫自以爲是而後之司河者之隨聲附和而且牟利其閒也與其有聚斂之臣甯有盜臣在他事則可在河工則不可河工而牟利宣洩必不合宜修防必不堅固一有疏虞民命繫焉此而不慎可乎然而爲君者一二日萬幾胥待躬親臨勘而後剔其弊日

不暇給焉則仍應於敬天明理根本處求之思過半矣予之舉兩大事而皆幸以有成者其在斯乎其在斯乎若夫察吏安民行慶施惠羣臣所頌以爲極美者皆人君本分之應爲所謂有孚惠心勿問元吉予嘗以此自勛也至於克己無欲以身率先千乘萬騎雖非扈蹕所能減而體大役眾俾皆循法而不擾民亦亟其難矣斯必有以振其綱而挈其要然後可以行無事而胥得宜實總不出敬明兩字而已故茲六度之巡撫諸皇子以來俾視躬之如何無欲也視扈蹕諸臣以至僕役之如何守法也視地方大小吏之如何奉公也視各省民人之如何瞻覲親近也一有不如此未可言南巡而西師之事更不必言矣敬告後人以明予志○召見皇子及軍機大臣等諭曰我皇祖臨御六十一年六巡江浙深仁厚澤浹髓淪肌臣民愛戴思慕出於至誠杭州省城行宮及

聖因寺均有恭奉

神牌每來展禮倍增感慕朕纘緒以來敬紹

前謨亦六度南巡凡籌辦河工海塘事宜無一不仰承 錄訓

奉揚

光烈今歲甲辰並攜諸皇子以來俾視予躬之如何無欲

扈蹕諸臣及僕役之如何守法地方大小吏之如何奉公民人之
如何瞻覲親近一有不如如此未可言南巡已於南巡記內詳晰宣
諭矣茲復召見諸皇子及軍機大臣並諭該督撫等密行存記以
朕所懷而未曾明諭者杭州及聖因寺行宮經朕六度親臨行慶
施惠官民瞻就依戀具見惻忱將來億萬年後臣民等自必仰遵
聖祖成規添安供奉用致思慕但禮因義起如御園之 安佑
宮熱河之 永佑寺 皇祖 皇考神御皆合奉一殿而各爲室
足昭如在之誠見在杭城行宮及聖因寺旣恭奉 皇祖神牌將
來設欲供奉止須於殿內之東室安設不得於見在行宮內別致

尊崇方協朕永依侍 皇祖之心而愉快矣必當遵此諭旨而行此方臣民必蒙其福著將此旨密行封記交富勒渾福崧敬謹供奉入於交代仍錄二通交上書房軍機處一體欽遵存記○庚戌

上自杭州回鑾○辛亥增設西安副都統一○壬子諭各省督

撫膺封疆重寄藩臬爲通省錢穀刑名總匯皆朕特加簡畀委任非輕自當仰體朕懷勤恤民隱俾所轄地方獄訟平允方無忝厥職乃近來民間詞訟經州縣審斷後復赴上司衙門控告者該督撫司道等往往仍批交原審之府州縣審辦在該州縣等心存迴護斷不肯自翻前案卽派委鄰近之府州縣會辦亦不免官官相護瞻徇扶同無論其審斷不公民情屈抑卽使所辦允當而形迹之間易涉嫌疑亦不足以服告者之心又何怪小民之紛紛瀆訴耶嗣後各省案件如有赴上司衙門控告者其距省較近地方該

督撫卽應親提人證卷宗至省發交藩臬親率秉公審辦設或道路遙遠人證較多恐致拖累通省內豈無公正明幹熟諳刑名之道府大員卽當遴委前往研訊確實毋枉毋縱庶各得其平自不至藉口銜冤復行瀆控著將此宣諭各督撫等轉飭所屬均宜勉矢公正詳慎聽斷庶不負朕諄諄告誡無使一夫失所之至意如有仍蹈徇隱故轍發交原審官以致案情出入小民屈抑求伸赴京控告者一經欽派大臣審出實情惟該督撫是問並通諭中外知之○甲寅 上駐蹕蘇州府○諭留京辦事王大臣會同該部議覆欽差尙書福康安等審擬廣東監生譚達元呈控總商沈冀川勒派伊弟沈體元公費銀兩承辦各官枉斷擬軍一案將巴延三李侍堯照因公科斂所屬財物律革職問擬杖徒固屬分所應得第念李侍堯久任封疆素能辦事是以加恩復行錄用自簡任

陝甘總督以來於剿捕逆回查辦監糧二事尤能認真出力而地方諸務亦俱實心整頓其令總商派斂公費購買物件與枉法受財者有聞所有用過公費銀兩議令按數賠繳亦足蔽辜李侍堯著加恩免其治罪從寬改爲革職留任巴延三人本拘懦朕早知其不能勝任繁劇曾向彼云若用爾爲陝甘總督亦必如勒爾謹之庸劣無能養癰僨事但伊幸遇地方無事所以不至貽誤卽公費一項亦係因循積弊究非藉端婪索已議將用過銀數追繳亦足蔽辜巴延三亦著照議革職加恩免其治罪仍俟到京後再行酌量差遣另降諭旨至尙安李質穎於譚體元初控時經朕特交伊二人審辦自應秉公研訊徹底根究乃心存瞻徇蒙混定案其咎轉較李侍堯巴延三爲重尙安李質穎俱著照部議革任尙安俟百日滿後酌派前往新疆辦事效力贖罪李質穎係內務府人

員候朕另行於內務府差遣○是月廣東巡撫孫士毅奏調任以
來查粵東地廣案多加以海洋交錯奸匪易藏惟有潔以持身嚴
以察吏不敢稍涉因循諱飾得旨廣東諸事廢弛一切勉力效李
湖爲之

閏三月丙辰朔兵部尙書額駙公福隆安卒賞銀五千兩治喪予
祭葬諡勤恪○以福康安爲兵部尙書復興署工部尙書○壬戌

上幸江甯府○安南國王黎維禱遣陪臣黃仲政等迎駕○癸

亥 皇元孫載錫生○甲子 上詣 明太祖陵行禮○賜安南

國王黎維禱 御書扁額○賜江蘇安徽召試進士莊選辰爲內

閣中書諸生劉召揚等四人爲舉人並授內閣中書江西召試諸

生譚光祥等二人爲舉人○乙丑 上閱江甯駐防兵○戊辰

上至張家樓登舟祭 江神渡江○壬午 上詣武家墩 龍王

廟 風神廟行禮○詣陶莊 河神廟行禮○祭 河神 上渡

河○甲申 上祭徐州 河神

夏四月乙酉朔諭據敦福奏稱達福已至喀什噶爾所有應交代之事盡皆詳細說明伊卽起程進京等語甚屬謬妄敦福竟非人類昧盡天良見有喀什噶爾之阿里木阿奇睦等控告並索取伯爾克之事均未辦結敦福竟思回家棄置不辦是何道理此等案件皆係伊會同保成列名具奏者自當俟奏摺如何批回乃伊竟安於無用在彼處儼同局外設使伊欲塞責亦應奏請暫留俟阿奇睦伯爾克等案件辦理妥時再行回京伊果如是朕必獎賞譬如伍岱法靈阿年滿更換人到並無見辦要事理宜交代回京若亦飾詞奏留朕必將伊等申飭今敦福並非無事處可比此皆敦福在外任時不知行何等傷天害理之事神鬼使之如此謬妄竟

欲與達福說明交代了事實爲笑談况敦福在巡撫任內辦理不善朕並未將伊治罪僅發往喀什噶爾效力係朕格外施恩伊毫不知感種種錯謬有似瘋癲大失滿洲體面糊塗之極漢大臣內有似此者朕尙治罪敦福係滿洲世僕更宜從重治罪以示懲誠敦福著革職發往伊犁交伊勒圖派令充當苦差聽其遣使將此交陝甘總督哈密吐魯番喀喇沙爾庫車烏什大臣等俟敦福行至何處卽將此旨傳諭革職由彼發往伊犁並著縣恩阿桂查明敦福有無子嗣若有子將見當何差具奏並嚴行查抄敦福家產以示懲儆此因敦福平日糊塗朕姑將伊寬恕儻係明白曉事之人敢於如此朕必將伊正法○准各省試用人員補期尙遠者呈明回籍俟到班時仍赴原省補用○庚寅 上詣 禹王廟分水

龍王廟行禮○諭綠營告休人員會臨陣受傷者准食全俸著

爲令○減直隸軍流以下罪○辛卯以陳用敷爲廣東市政使

四川布政使

○甲午命烏魯木齊行保甲法○庚子賞原任禮部侍郎

贈尙書蔡世遠之孫本崇舉人○壬寅郝碩以不稱職召來京以

李綬爲江西巡撫○癸卯命哲哩木等六盟之蒙古王貝勒貝子

公扎薩克台吉明歲年屆六十者入干宴宴○命奉天採購麥石

運京備糶○甲辰以河南衛輝等屬旱免汲縣等十六縣逋賦○

乙巳免直隸大名等七州縣逋賦○丙午甘肅新教回人田五等

聚眾滋事命李侍堯剛塔勦之○丁未 上還京師○庚戌免陝

西甘肅三十八年至四十六年逋賦○辛亥調李綬爲湖南巡撫

以伊星阿爲江西巡撫○甲寅賜茹棻等一百十二人進士及第

出身有差

五月丙辰綽克托以總理回疆辦事乖謬奪職逮問以慶桂爲工

部尙書

由福州將軍遷

○丁巳諭塔永阿年力就衰著專辦護軍統領事

務不必兼內閣學士其內閣學士員缺著塔彰阿補授所有工部

右侍郎員缺著伊齡阿補授○諭前據李侍堯剛塔奏小山逆回

田五阿渾倡設新教糾眾滋事攻破西安土堡往靖遠一帶村莊

搶掠已節次降旨令該督等督率官兵迅速擒捕矣本日李侍堯

奏官兵於二十三等日兩次打仗殺賊甚多頭人田介洪吳二

韓二先後被殺賊匪首犯田五腹中槍傷在馬營水抹脖子身死埋

屍小溝差守備朱進廷前往創驗面貌相符割取首級梟示餘贖

有八九十人竄往余家溝一帶見已添派官兵上緊追拏等語逆

回田五於光天化日之下膽敢私復新教糾眾搶掠民間且抗拒

官兵不法已極提督剛塔一聞稟報卽帶領弁兵馳往勦捕李侍

堯亦往鹽茶廳督率查拏未及一旬賊首已受傷自斃逆黨頭人

東華續錄

卷九十一

五犯就戮者三人大局已定其竄往余家溝一帶之賊數十人不
過苟延殘喘無難剋期殲滅李侍堯等辦理此案甚屬妥速且鹽
茶廳拏禁賊犯及犯屬甚多昨經降旨令該督先行審明將各該
犯卽行正法以絕賊人窺伺搶救之念今李侍堯於未奉到諭旨
之前業經籌慮及此將各要犯四十九名卽行正法與朕所降諭
旨符合足見其能辦事而朕從前棄瑕錄用實能不負委任本應
予以優敘但此案究係李侍堯前次查辦新教未能淨盡平日又
疏於防範所致其功過兩不相掩李侍堯著照例議敘至剛塔齊
勇殺賊親身射死賊目並經帶有箭傷前經賞給御用玉韞大小
荷包以示嘉獎仍著交部從優議給世職以旌勞勇其在事將弁
著該督等查明實屬奮勇出力列爲一等交部議敘用示獎勵至
此次賊匪糾眾滋擾其口食斷不能自行攜帶自係沿途搶掠焚

燒居民受累在所不免並著李侍堯查明被擾村莊如有應行撫恤者酌加撫恤毋使失所副朕軫念體恤之至意○命工部尙書慶桂軍機處行走○辛酉諭喀什噶爾巡外色默爾罕地方有已經伏誅叛回之大和卓布拉呢敦之子薩木薩克潛在該處遣回人托克托素丕等與喀什噶爾之回人默羅色帕爾私通信息一事布魯特散秩大臣阿其睦之弟額穆爾潛留托克托素丕等經喀什噶爾之阿奇木伯克鄂斯瑞訪知情形阿其睦恐伊弟罹罪卽稱鄂斯瑞亦與薩木薩克通信赴綽克托保成處誣告又英吉沙爾之阿奇木伯克阿里木接受薩木薩克之信亦恐被鄂斯瑞查出至綽克托保成處誣告綽克托保成審訊所控皆虛並不妥速訊斷一味調停姑息惟令阿里木阿其睦等與鄂斯瑞陪罪和息完結奏聞所辦惟冀顛預了事甚屬錯謬此事保成等初次奏

到朕卽豫料伊等不能辦理妥協屢次諄諭令將阿其睦等解京保成接奉諭旨後隨遵旨將阿其睦額穆爾阿里木等並接受薩木薩克書信之回人默羅色帕爾等一併拏獲分起押解來京新疆回眾布魯特等受朕深恩安居已久卽將阿其睦等拏解來京有何疑畏綽克托受朕倚任身爲參贊大臣總理回疆事務遇此等事件何至昏懦無能一味姑容若是且綽克托一聞保成將阿其睦等拏解之信卽將其親屬布魯特侍衛額森阿三拜等一併拏解更屬荒唐幸今阿其睦等就獲解京綽克托尙可儆倖一綫若阿其睦等竟致遠遁朕必將伊正法以申國典著海祿傳旨卽將綽克托革職拏解來京交刑部治罪仍令海祿將布魯特額森阿三拜卽行釋放並諭知此事皆綽克托辦理不善所致今已將伊治罪與爾等無涉善爲慰撫令其照舊當差至保成始而未能

受速辦理繼而扶同姑息了事罪亦不在綽克托之下幸接奉諭旨卽能將阿其睦遵旨拏解送京辦理妥協功過尙足相抵保成免其同綽克托一體治罪仍應交部議處至阿奇木伯克鄂斯瑞感激朕恩於薩木薩克與回眾潛通音信之事毫無隱諱一經得信卽報知保成隨同實心查辦始終奮勉甚屬可嘉著加恩晉封貝子以示獎勵又保成等奏行知阿揚阿查拏葉爾羌所屬色喀庫勒地方居住阿其睦之弟昆楚克解送喀什噶爾之處亦可不必此事原係額穆爾潛將薩木薩克所遣回人托克托素丕等收留阿其睦惟恐伊弟獲罪一時愚昧將鄂斯瑞誣告不過欲圖卸罪其咎尙輕阿其睦解到時朕念其原係出力之人尙可酌量施恩至伊弟昆楚克旣另處居住尤與此事無涉豈可因伊兄獲罪一併株連卽已經拏獲或到葉爾羌或到喀什噶爾著阿揚阿保

成明晰慰諭令其仍回遊牧照舊當差並將此事罪止額穆爾一人卽阿其睦尙可寬恕之處徧行曉諭咸使聞知其所屬十九部落布魯特人等令其各安生業無須疑畏仍令喀什噶爾至哈密一帶地方駐紮大臣俟阿其睦解到時卽將朕已加恩不將伊從重治罪之處先行詳細曉諭又保成奏請將布魯特多連等量升一級換給頂帶之處俱如所請准其升級改換頂帶其塔史密里克等處請署伯克事務亦著照所請行此案通行完結後並著揀選布魯特能幹曉事之人令其分管十九鄂拓克事務除另行降旨傳諭保成外所有原摺一併抄發朕辦理庶務惟期執中以歸至當卽如阿其睦等必須擊解來京者實因事理所在必應如此辦理方能永遠無事似此深思遠慮諸臣何見不及此蓋此事端倪始由大兵平定準噶爾以後所有回眾俱各安居樂業獨大和

卓布拉呢敦不知感戴朕恩背叛伏誅其子薩木薩克甫三四歲
伊乳母攜往潛逃安集延境外爾時朕仰體 上天好生之德不
忍捕誅寬赦至今薩木薩克見已年屆三旬餬口無資狀同流丐
伊若早知感戴朕恩傾心歸附懇求救宥朕必將伊寬貸加恩贍
養頃鄂斯璫意欲差人相機勦除經保成等密奏朕猶以爲勦除
薩木薩克非天朝寬大之體尙當示以寬仁宣召薩木薩克來京
瞻覲酌量加恩俾令樂享昇平不意薩木薩克悖妄無知潛行遣
人寄信招致喀什噶爾回子伯克誘取銀物幸被鄂斯璫舉發徑
行申報保成查辦兼以所遣回人托克托素丕等經阿其睦等之
弟額穆爾容留事洩亦被鄂斯璫訪聞阿其睦心知事發恐伊弟
額穆爾罹罪反將鄂斯璫誣告設果以阿其睦額穆爾爲是勢必
轉將鄂斯璫誣坐治罪以快阿其睦等之心不但從來無此辦事

體制又何足以服人心乎惟念阿其睦究係布魯特愚蠢無知朕
仍欲格外從寬辦理此事初由額穆爾一人造意俟拏解來京止
將額穆爾一人治罪阿其睦仍加恩寬宥並賞給房屋廩祿取其
家屬俾得共獲安居樂業並降旨將保成所奏業已查拏阿其睦
另居之弟昆楚克綽克托所奏查拏阿其睦之親屬布魯特額森
阿三拜俱令釋放照舊當差卽此豈非格外施仁不肯株連之意
乎此事綽克托始終未能擔承辦理保成亦不過僅遵諭旨將阿
其睦拏解來京設如伊等所見姑息了事且亦必致將來生事旣
不足示儆將來各處新疆駐紮大臣遇事又將如何辦理綽克托
係朕委任邊疆之參贊大臣辦理不善若此若不拏問治罪何以
示懲保成等具奏此事初到之時朕悉心籌度必當將阿其睦等
拏解來京諄諄訓誡不啻日夜籌畫今旣成事恐內外臣工不能

周悉著將始終辦理原委詳悉明發諭旨徧行曉諭中外知之○
諭軍機大臣等前據李侍堯奏賊首田五已殲餘黨竄散官兵截
拏追剿朕意此時自當早已完結本日又據奏到馬家堡黑莊兩
處賊匪屯聚約有一千餘人見調取官兵接續以爲必勝之計等
語此案賊首業經殲斃官兵所殺之賊又有數百名乃此時尙有
千餘賊眾自係田五斃後其餘賊李鬍子馬鬍子又復隨處勾結
脅誘可見新教煽惑人心牢不可破必當淨絕根株勿留餘孽至
此時西安及甘州甯夏各處官兵俱已調集四路進剿堵截總宜
迅速辦竣毋使再有蔓延方爲妥善○免山東兗州等三府州屬
上年帶徵漕米○壬戌 上啓鑒秋獮木蘭○免經過地方本年
額賦十分之三○癸亥免陝西延安等三府州屬四十七年四十
八年逋賦○丁卯諭軍機大臣等據李侍堯奏接提臣剛塔咨稱

五月初五日據弁兵探得馬家堡內賊匪竄逸惟見空營一座搜獲山溝內避賊回民訊據供稱賊回見官兵勢大黑夜從轍家梁翻山至鐵木山而遁不知去向等語所奏大奇前因該督等奏馬家堡後靠山居險朕卽慮其翻山逃逸早經節次傳諭並令李侍堯迅速親赴該處會同剛塔等設法四面嚴密圍堵務將賊匪全行勦殺毋使一名免脫乃本日李侍堯奏賊匪果由山後逸出是朕先幾一動不意竟如所料而剛塔率領數千官兵在彼攻勦止向山前截殺並不慮及山後設法嚴防李侍堯則安坐靖遠並不親身前往相度機宜督率調度雖經朕屢降諭旨令伊等嚴防後路皆已不及朕惟當自愧用人之不當耳前因賊首田五殲斃大局已定會降旨將李侍堯交部議敘剛塔從優議給世職乃見在所存不過賊人餘黨竟不能卽時勦滅致有逃逸之事是李侍堯

剛塔不但無功而且有罪所有議敘之處著停止仍令戴罪立功
迅速追剿務將賊匪盡數擒拿如有一名漏網惟李侍堯剛塔是
問仍俟事竣後覈其功罪另降諭旨所有硃批李侍堯摺及節次
所降諭旨著發交行在王大臣等閱看並著鈔寄阿桂交在京王
大臣等閱看○以劉躍雲爲內閣學士軸轡○戊辰 上駐蹕避
暑山莊○己巳諭李侍堯等於剿捕回匪一案未能妥協著派尙
書福康安帶欽差大臣關防同領侍衛內大臣海蘭察帶領巴圖
魯侍衛等分起馳驛前往剿捕督辦所有隨帶軍機處司員亦著
一併馳驛○辛未諭軍機大臣等剛塔奏初九日馬營街剿賊情
形一摺看此光景較前稍有起色但賊見屯聚馬營街剛塔俞金
鰲圖桑阿等所帶之兵俱已到齊卽應各領弁兵分布前後左右
將賊人四面合圍併力進攻方能一舉集事盡數殲除不至仍前

翻山逃竄乃閱摺內該提督等仍會集一處並不籌算及此若復致賊人翻山而遁更屬不成事體又本日據李侍堯奏稱靖遠見無留辦之事卽起程前赴鞏昌安定一帶賊蹤較近處駐紮辦理等語李侍堯旣知應親往辦理卽當星赴馬營街打仗處所與剛塔等面商妥辦乃僅於賊蹤較近之處逗遛駐紮是何言耶看來此事剛塔惟知在賊後尾追全不籌及繞在賊前並督率官兵分布左右以期四面圍殺不使竄逸俞金鰲圖桑阿等則以剿賊爲剛塔一人專責伊等如幫辦者然而李侍堯則一味退縮不前仍思於賊蹤不到之處遙遙安駐似剿賊事宜與伊無涉彼此推諉竟無一人實心承辦李侍堯剛塔俞金鰲圖桑阿著再傳旨嚴行申飭此時若再不派重臣前往督率恐有貽誤昨已令尙書福康安同領侍衛內大臣海蘭察帶同巴圖魯侍衛章京等馳驛前往

但福康安到彼尙需十餘日而此時剿賊正在緊要之際伍岱素嫻軍旅曾爲參贊大臣福康安未到之先卽著伍岱總理一切所有彼處帶兵之大臣官員俱聽其節制調度伍岱此時務當相度機宜速籌圍剿不可使賊人有一名免脫亦不可因福康安未到稍存觀望等候之見至賊人白馬家堡奔竄後又有楊填四等聚眾接應並有張阿渾馬建功等亦被賊人糾約入夥以致復行屯聚且賊營內俱係新白布帳房又有烏槍等項器械賊人甫經竄逸各處回民卽紛紛接應人夥帳房器械等物俱非倉卒可辦從前蘇四十三滋事尙因副將新桂知府楊士璣激成此次賊匪竟係蓄謀已久暗中勾約豫備所以能同時聚擾皆由李侍堯平時不能督率地方文武員弁漫無防範覺察所致俟事竣後著福康安查明詳悉參奏另降諭旨又前此賊人田五等自小山起事後

其餘賊由鹽茶廳至西鞏驛一帶四出奔竄所經之處地方已屬遼遠沿途村堡被賊搶掠百姓受害者必多且前據該督等查有民人展廷隆因賊脅令入夥不從父子受害可見民人等平時受朕撫恤深恩雖遭荼毒仍至死不肯從賊殊堪嘉憫昨已降旨令福康安到彼會同該督卽詳晰查明酌量撫恤李侍堯接奉諭旨卽速先行普諭各屬務期良民安輯毋使一人失所再據李侍堯奏分竄鷹窩石賊匪經副將八十五玉柱等帶兵迎截擊斃甚多所辦尙好八十五玉柱等於分竄之賊能奮勇截殺亦屬可嘉著存記俟事竣後福康安查明果係出力奏聞候朕降旨其餘賊二十餘人李侍堯仍嚴飭該副將等上緊擒拏務獲勿任乘閒逃竄○壬申諭軍機大臣等據伍岱等奏賊人復行竄逸且有石峰堡等處回民聚集滋擾之事並稱回匪頭人有馬阿不都馬之元沙

之王馬世雄四人都是三掌教頭目更有小頭人四名等語新教匪徒竟有三掌教名目可見伊等掌教內已有等第層次是其蓄謀已久必非朝夕所能猝合李侍堯身爲總督且從前剿除蘇四十三後所有斷除新教之事卽責成該督專辦乃該督於新教回匪等公然自立掌教名目等次之事毫無覺察任其煽惑勾結以致釀成事端豈封疆大臣惟知厚享廉俸安坐衙齋而於地方此等重大事件全不知留心防範有是理乎福康安到後卽查明此案如果係李侍堯平時漫不經心養癰貽患所致卽據實嚴參具奏至賊人屢次逃逸糾合夥眾擾害地方揆度情形必須滿洲勁旅前往方能迅速肅事著傳諭阿桂於火器健銳兩營內挑選精兵一千名豫備聽候諭旨再行帶領起程所有分隊帶領之侍衛章京等並著酌量選派京兵聲勢壯盛經阿桂帶領前往尤足以

壯軍勢而懾人心阿桂所帶京兵一到自可會同調度剋期竣事也所有沿途應用車輛著傳諭劉綦何裕城畢沅不動聲色飭屬密行妥備勿致臨時貽誤亦不可稍涉張皇直隸派景祿河南派江蘭陝西派圖薩布專司其事護送出境○癸酉諭本年三月十二日據喀什噶爾辦事大臣保成等奏喀什噶爾池外色默爾罕地方有前經背叛伏誅之大和卓布拉呢敦之子薩木薩克潛遣伊親隨回人托克托素丕等私與喀什噶爾回人默羅色帕爾暗通信息誘取銀兩一事朕彼時以薩木薩克竄匿遠地餬口無資狀同流丐其與喀什噶爾回人通信不過希圖誘取銀物但將接受書信之人及薩木薩克所遣之托克托素丕查拏懲治已足示儆乃布魯特散秩大臣阿其睦之弟額穆爾擅將托克托素丕私自容留經喀什噶爾阿木奇伯克鄂斯璊訪聞舉發阿其睦不知

感戴朕恩一味偏護伊弟恐其罹罪又英吉沙爾之阿奇木伯克
阿里木亦曾接受薩木薩克私書恐鄂斯瑞查辦遂與阿其睦同
謀陷害指稱鄂斯瑞亦曾與薩木薩克私通信息等情先後至保
成處誣告經保成審出誣控情節阿其睦不知愧服又率伊子燕
起前往烏什綽克托處誣告其時綽克托並不妥速剖斷一味調
停姑息帶領阿其睦等前往喀什噶爾會同保成令阿其睦阿里
木等與鄂斯瑞陪罪和息完事具奏所辦錯謬之至前此保成初
奏此事時朕悉心籌畫若不將阿其睦等擒治不久必生出事端
當卽降旨令將阿其睦等拏解來京方爲妥善諄諄訓誡至再至
三昨保成始將阿其睦等與阿里木及案內有名回人一併拏獲
分起押解進京乃綽克托聞知保成如此辦理張皇失措竟將案
內毫無關涉之阿其睦親戚布魯特額森阿三拜一併拏解具奏

所辦更屬荒唐因卽降旨令將布魯特額森阿三拜釋放並傳諭
新授之叅贊海祿曉諭伊等與此案無涉善爲慰撫令其照舊當
差並將綽克托革職拏解來京交刑部治罪矣據綽克托奏稱此
旨未到之先額森等當差人拘拏時情詞極爲恭順並稱被阿其
睦株連受累深爲怨恨今情願入京朝覲且一面曉諭伊所部之
布魯特等此係阿其睦與鄂斯瑞構陷以致株連毋得妄生疑慮
混行舉動是額森洵屬布魯特中明理安分之人前業經施恩賞
給段匹並予升級換頂令其仍回游牧節經降旨海祿遵辦矣朕
又將保成等所奏拏獲阿其睦之弟昆楚克免其株連亦降旨速
行慰諭釋放此事鄂斯瑞並不因阿其睦等誣告稍存畏忌隱飾
始終奮勉幫同保成擒拏阿其睦是以施恩晉封貝子以示獎勵
至保成從前扶同綽克托釋放阿其睦固屬咎無可辭及接奉朕

旨卽能將阿其睦等拏解功過足以相抵是以止令交部議處以期賞功罰罪咸歸允當至保成拏解阿其睦後其子燕起疑懼潛逃彼時本不必遣人追趕乃保成因遣去之回子伯克呼圖魯克默特等被燕起戕害復欲調烏什等處官兵前往追趕意圖剿滅燕起所辦又屬過富奏到時朕卽已降旨海祿保成等將戕害回人家口酌量賞恤此事若因燕起一人逃竄卽調兵擒拏甚屬不值詎綽克托一聞調兵信息輒輕舉妄動檄調伊犁烏魯木齊烏什各處官兵所奏更爲謬妄已有旨令其速行停止朕因伊等措置乖方正在憤懣聞據喀喇沙爾辦事大臣福祿奏保成所調之土爾扈特官兵已停止不發等語覽奏深爲嘉許大臣等受朕委任能如福祿之籌酌得宜隨時奏聞方爲不負任使至拏解阿其睦送京一節諸臣多存畏蒞之見皆由未嘗深悉事理惟務姑息

調停卽阿桂伊勒圖始亦未嘗不欲消弭其事今燕起遁逃其追趕之回子伯克復被戕害不但綽克托必以爲因擒拏阿其睦所致卽阿桂伊勒圖亦未必不以不聽老成之言致有此事豈知擒拏阿其睦以致燕起脫逃原朕意中之事斷不諱也此實與我皇祖定計剿滅吳三桂出自獨斷者情事無異至追趕燕起之回子伯克被傷亦因燕起情急拒捕不過欲得遠遁後布魯特人眾並無隨往同逃者情勢窮蹙已可想見從前布魯特之多連來喀什噶爾報信時伊之屬下布魯特疑懼將欲遷徙多連聞信卽往追喚回茲何必爲拏一無關緊要之燕起張皇發兵致令布魯特人眾驚疑乎頃接保成奏審訊阿其睦親屬及跟隨人等供稱阿其睦早已向其子弟商議至八月馬肥時再尋事端等語其明驗也此豈保成豫窺朕旨捏造此語乎內外大臣等試詳思辦理阿

其睦之事若如綽克托等之欲消弭不辦勢必轉將鄂斯瑞治罪或阿其睦之心乃釋疑然尙未能保其始終無事天下有如此是非顛倒辦理者乎卽阿桂伊勒圖亦始思消弭其事者所奏雖屬因公特所見淺近未嘗深思全局耳然朕亦不罪伊等蓋爲國家大臣遇事籌度機宜據實陳奏原朕所喜也然使不將阿其睦等速拏進京至八月閒伊舉事時喀什噶爾地方必生一事難於收拾矣著將保成等所奏審訊阿其睦等親屬跟隨等供詞譯漢通行曉諭朕總攬萬幾無事不悉心籌畫務合機宜恐內外大臣不能周悉此事原委以朕爲好興事朕老矣欲無事之不暇戒得在念何必復興事自取其勞然事在不得不辦朕亦不敢耽逸畏勞而不盡心辦理也特將始終辦理情形詳晰通諭中外知之○甲戌以阿桂爲將軍福康安海蘭察伍岱爲參贊大臣領京兵進剿

逆回○乙亥以舒亮爲領隊大臣釋明亮春甯於獄賞藍翎侍衛
命隨往軍營效力○丁丑予故和碩鄭親王積哈納祭葬諡曰恭
○戊寅諭軍機大臣等拏問布魯特散秩大臣阿其睦等一事原
因伊弟額穆爾與薩木薩克潛通阿其睦如將額穆爾縛獻朕必
加恩將伊等之罪寬宥乃袒護其弟遂與阿里木誣控鄂斯璊亦
與薩木薩克潛通既經審虛阿其睦尙無悔心合謀遠遁是以將
伊拏問伊子燕起旋亦畏罪脫逃喀什噶爾大臣等奏請調兵數
萬追拏及助力之布魯特等盡行剿除所辦未免太過布魯特等
投誠以來沐恩已久爲燕起一人剿除各屬朕心深爲不忍卽令
停止調兵至額德格訥部落之布魯特比葉爾鐵拜與其兄阿爾
體拜派兵追拏燕起朕深爲嘉悅已獎賞段匹果能拏獲自當加
恩卽或不能亦不加罪若不通行曉諭則各屬布魯特何由知朕

矜恤至意著傳諭海祿保成將此旨用布魯特字書寫傳集布魯特等令其普爲曉示邊卡內外各鄂拓克所屬之布魯特等不必畏懼安常守分以期永沐朕恩○己卯以汪新爲湖南按察使

山西布政使

○庚辰諭從前甘省蘇四十三因新舊爭教地方官辦理

不善致釀事端小醜跳梁立時撲滅節經降旨李侍堯將通省新教回民當不動聲色密行查辦斷絕根株以靖邊疆而安良舊舊教之回民是查辦新教乃李侍堯分內專責經數年閒該督止查拏一二人奏聞辦理乃爲時無幾復有固原所屬小山回民田五等聚眾謀逆之事攻城掠堡傷害官兵因令李侍堯查明賊人起事根由據奏靖遠城回民勾通內應一節本年三月十五日眾新教回人齊集禮拜寺將田五糾眾謀逆情節告知約令臨期內應等語是賊人多係新教久蓄逆謀公然於縣城內齊集糾約李侍

堯安坐省城毫無聞見則從前之查拏一二回匪不過藉以塞責而其並不實心查辦已屬顯然迨賊首田五就斃餘黨竄入馬家堡剛塔等帶兵追趕李侍堯惟知株守靖遠藉稱審辦賊犯家屬而於一切攻剿機宜竟視爲非伊總督本分內應辦之事止委之提督以致軍營統攝無人賊匪乘閒翻山而逸經朕再四訓飭李侍堯始行移駐安定仍與剛塔等軍營相距遙遠彼此信息止憑文札往來從來行軍之道有如此之玩延懦怯者乎且各處從逆賊匪一經拏獲卽當審明立時正法乃據奏鹽茶靖遠安定地方見尙有見審未辦之犯此等爲逆回匪有何疑難耽閣李侍堯無非藉以遷延觀望遠避賊鋒巧爲卸過地步是其避重就輕豫存文飾之見豈能逃朕洞鑒眞所謂欲蓋彌彰也此事李侍堯旣玩愒於平時又畏葸於臨事遂使賊人蔓延猖獗到處勾通李侍堯

之罪實無可追李侍堯著革職暫留甘省戴罪效力辦理軍需事務俟賊滅事竣另降諭旨其陝甘總督員缺著福康安補授福康安到甘時再行傳旨接印任事至剛塔於賊匪竄入馬家堡時並不堵截後路縱賊潛逃復札會總督展轉耽延迨賊遠颺始帶兵尾追以致賊人四出勾結日益滋蔓擾害地方且於賊人攻破通渭縣城及在石峰堡肆行紛擾之處毫無策應失機債事其罪更無可追剛塔著革職拿問解交刑部治罪其固原提督員缺著哈當阿補授見在河州有防範事宜哈當阿不宜卽離該處其未到任之前著伍岱署理固原提督印務見在各處官兵厚集阿桂福康安先後到彼相機攻剿諒此窮竄么麼自無難卽時殄滅所有李侍堯剛塔辦理此事始終貽誤緣由及朕批閱李侍堯原摺一併發鈔通諭中外知之○以復興爲參贊大臣善德爲領隊大臣

赴甘肅協剿逆回○辛巳諭據喀什噶爾辦事大臣保成等奏稱額德格訥部落布魯特葉爾鐵拜遵檄與伊兄阿爾體拜伊弟沙米爾紮並保成等所遣六品阿奇木伯克沙巴克等率領布魯特騎兵三千餘人奮勇追捕擒獲燕起與額穆爾之子和卓木雅爾等男婦子女並將隨同燕起之布魯特黨與全行擒獲等語此事朕早已料及從前布魯特散秩大臣阿其睦被拏之後其子燕起聞信逃竄本係無關緊要且知其斷不能生事是以諭令無須張皇調兵自可從容就獲業經明發諭旨矣今額德格訥部落布魯特葉爾鐵拜感戴朕恩遵奉喀什噶爾大臣等札諭與伊兄弟率領騎兵三千會同保成等所遣之阿奇木伯克沙巴克奮勇將燕起等擒獲實屬安速遠部之布魯特能如此抒誠宣力甚屬可嘉朕深爲欣悅葉爾鐵拜著加恩賞給二品頂帶授爲散秩大臣銜

並賞戴花翎伊兄阿爾體拜弟沙米爾紮俱著賞給三品頂帶亦賞戴花翎仍交保成等於庫貯銀內賞給葉爾鐵拜大元寶五阿爾體拜沙米爾紮賞給大元寶四另將大元寶二十交與葉爾鐵拜分賞擒獲燕起出力之眾布魯特等以示獎勵其擊獲之燕起並額穆爾之子和卓木雅爾等要犯數名及阿其睦額穆爾等親屬解到喀什噶爾時卽行分起揀派才幹侍衛官兵陸續防護押送仍由三眼井取路於沿邊一帶馳驛迅速解赴熱河其餘燕起之妻孥暨隨同燕起逃竄之布魯特黨與並查獲阿其睦等遊牧處所牲畜及見在俘獲之器用等項俱著全行賞給葉爾鐵拜至派出追捕燕起之六品阿奇木伯克沙巴克此次甚屬出力可嘉著加恩交保成等賞給大段四匹仍遇有應升大伯克缺出卽行請旨升授以示獎勵又緝捕燕起帶兵堵禦防守要隘之充巴噶

什部落博什輝又與沙巴克率兵圍捕燕起充巴噶什部落之布
魯特華特暨額德格訥部落阿哈拉克齊雅科蒲穆拉特格岱等
均屬出力報效俱著交與保成照原品加升一級更換頂帶各賞
一大元寶以示獎勵此次葉爾鐵拜等感戴朕恩抒誠宣力朕加
恩分別賞賚之處著保成等通行曉諭眾布魯特咸使聞知至保
成等前因燕起逃竄一案所辦冒昧曾經降旨令軍機大臣會同
該部嚴察議奏今將燕起及伊親屬一併拏獲辦理頗屬妥善功
過尙足相抵保成達福俱著從寬免其議處此次鄂斯璊幫同辦
理始終出力保成鄂斯璊著賞給御用大荷包各一對小荷包各
二對著將此旨及保成等奏摺發鈔傳與阿桂福康安伊勒圖海
祿等閱看並將此通諭中外知之○諭慶桂著調補兵部尙書其
工部尙書員缺著復興調補復興見在出差所有工部尙書事務

仍著農桂兼署阿揚阿著補授都察院左都御史其未到任以前著德保兼署穆精阿著轉補刑部左侍郎其刑部右侍郎員缺卽著塔琦補授○壬午諭昨據署鑲白旗滿洲都統克勤郡王雅朗阿等奏稱該旗記名以知縣用之工部筆帖式明住前經吏部以該員有無老親能否久於外任之處咨查該旗時值明住患病該領催詢之伊兄明興據稱伊母見年八十一歲明住不能久任外省該領催卽呈明該參佐領咨覆吏部去後嗣明住病愈復在雅朗阿處呈稱伊母雖係年老身體尙屬康健可以隨任情願外用雅朗阿卽據呈准其仍以外用咨行吏部並請將參佐領交部察議領催責革等語所辦甚屬錯謬夫求忠臣必於孝子之門明住之母年旣八十有餘該員自應在京當差以便朝夕侍養況見據伊兄明興告知該旗伊弟不能久於外任則其母之衰邁可知乃

明住猶稱可以隨任者其意不過貪圖外任多得廉俸耳設使明住選授遠省以八十一歲之老母迎赴任所衰年跋涉豈無意外之虞若明住僅攜其妻孥赴任轉留其母在家不得侍奉於心又何以自安縣令爲親民之官一經除授卽當教民以孝悌之義似此忘親貪祿又安能訓迪斯民耶至都統爲統轄一旗大員平日應以忠孝訓勵旗人雅朗阿等如果明曉大義當明住具呈時卽應將該員嚴行訓飭批駁何得復爲據呈咨部且伊等之意尙以明住爲該旗參佐領等所屈抑奏請將參佐領等察議領催責革有是理乎朕以孝治天下近因提督李國梁之父年逾九十曾往湖南任所一次緣該處炎熱水土潮溼仍回直隸原籍朕體恤伊父年邁特將李國梁調任直隸以遂其就養之私又副都統敦倫泰之父母俱已年老皆在西安先因新疆地方緊要需人不得不

令敷倫泰前往旋以該處業經事竣卽將伊調任西安使得就近侍養朕於大小臣工欲其盡力宣猷必令其克供子職是以無不曲加體恤至於出征行陣原不在此例者記云戰陣無勇非孝也蓋以勤勞王事卽所以顯揚父母不得以私情而廢公義若尋常服官凡身爲人子者豈可貪戀祿俸而不一動桑榆之念耶明住停其十年升轉永不許保送知縣以示懲儆嗣後各旗文武官員如有父母年至七十五歲以上者均不准保送外任庶旗員共知祿養承歡克敦內行亦移孝作忠之一道也雅朗阿諾穆親將明住咨部仍以外用之處實屬糊塗不曉事理著將伊等申飭交部議處其參佐領無庸交部察議領催令照舊當差此事於我滿洲風俗人品大有關係爲此明白宣諭中外知之○癸未諭前因郝碩於江南行在陛見詢以地方事務奏對茫然不中肯綮曾降旨

申飭又聞伊在巡撫任內操守平常令薩載於赴江西查閱營伍之便訪查據實具奏茲據薩載奏到查得郝碩聲名甚屬平常性情猜忌竟有勒派屬員之事見據藩司馮應榴等說出郝碩前因進京陛見短少盤費又因應交海塘公項屢次向各司及各府州縣等勒派銀各一千餘兩至數百兩不等其各府州縣所送銀兩先後交南昌府知府湯萼棠黃良棟南昌縣龔珠富森布同知鄭廷柱徐聯奎李洗心等收存隨時取用等語郝碩受朕厚恩擢任巡撫理應實心任事潔已奉公乃於地方事務置若罔聞輒藉進京盤費海塘交項屢向屬員婪索以致合省承風公幫私派統計收受餽送銀兩竟至累萬盈千敗檢孤恩莫此爲甚從前國泰在山東時性情乖張屢向屬員需索其時首府呂爾昌馮埏等爲國泰收存銀兩一經敗露無不水落石出此事係在四十七年其時

郝碩豈不聞知畏懼乃仍敢效尤復有此貪婪派累之事覈其款
蹟竟與國泰無異郝碩見在來京候旨已另有諭旨交直隸山東
督撫沿途迎截革職拏問解至熱河審訊治罪至藩司馮應榴臬
司吳之鰲廣饒九道額爾登布均有奏事之責乃於巡撫貪婪劣
蹟並不據實奏聞且曾餽送銀兩豈可復勝司道之任馮應榴吳
之鰲額爾登布應與餽送銀兩之鹽法道杜憲糧道舒希忠吉南
新道邊學海一併革職其餽送銀兩復代爲收存之南昌府知府
黃良棟同知徐聯奎李洗心原任同知鄭邦柱南昌縣知縣富森
布俱著革職交薩載嚴審定擬具奏其餘各府州縣並著薩載審
明照國泰案內屬員餽送銀兩之例分別辦理具奏候朕另降諭
旨○諭江西布政使員缺著李承鄴署理按察使員缺著姚梁署
理著各速赴新任不必來熱河請訓○諭馮光熊前於江西按察

使任內曾餽送郝碩銀兩難以復膺藩司之任馮光熊著革職仍留甘省戴罪效力協辦軍需事務其甘肅布政使員缺著浦霖補授

六月甲申朔諭甘省逆回滋事先經革職總督李侍堯奏稱此事因小山逆回田五等謀興新教起釁經朕以該犯等欲興新教糾眾謀逆遂降旨飭詢始據該督將本年正月內田五在靖遠哈得成哈彥家商同謀逆各情節覆奏又據西安將軍傅玉奏訊之甘省居民僉稱眾回匪於上年五月卽修理石峰堡並約定本年五月五日起事通渭等處亦據報同日被賊搶劫等語是賊人肆逆不法早已豫蓄奸謀並非因爭教起事夫內地回人其來已久我國家威棧遠播平定準部回部西域咸隸版圖新疆回人年班入覲往來絡繹內地民人亦多至回疆貿易其有查對經卷講習規

條者相習爲常例所不禁遂有紅帽白帽新教舊教之名其實新疆之回人正其舊教也且見在內地回民所習之教所講之經皆與喀什噶爾葉爾羌等處回人經教無異原無新舊之別況內外均屬編氓赤子順則恩有可加逆則法無可宥今賊首田五已就殲斃其餘黨馬鬍子李鬍子等膽敢於光天化日之下聚眾鳴張攻城掠堡卽屬回民中之邪教如僧中白蓮教之類而已昨已命大學士阿桂陝甘總督福康安前往督辦並派京兵及飛調四川屯練降番暨阿拉善鄂爾多斯各處蒙古兵丁到彼協剿大兵雲集諒此么麼小醜自無難速就殲除至阿桂福康安於剿滅賊匪後止須將賊人經過煽誘之處所有平時與賊人勾結知情及賊人起事後代爲往來送信接濟糧食之人卽係邪教亂民必須實力搜捕正法勿使復如李侍堯之養癰其餘並未從逆之回人不

必更分舊教新教皆係良民概毋庸波及以免株連總之查辦此事止當分別從逆與否邪正之殊不必論其教之新舊卽如僧道原非例禁而白蓮等邪教之必應查究者亦以其左道惑民聚眾滋事也嗣後阿桂等奏摺內凡從逆回匪俱稱邪教不必復分新舊名目俾回民等咸知朕洞悉其教根源不分畛域斷不肯因滋事賊匪將無辜守法良民一併株連之至意將此通諭中外知之並著阿桂福康安及各直省於凡有回民處謄黃徧貼宣示知之○庚寅免甘肅全省本年額賦○癸巳諭據在京步軍統領衙門將郝碩截拏解至熱河經軍機大臣會同刑部審訊錄供具奏本日朕親行刑訊據郝碩將收受屬員餽送各款一一供認俯首無辭從前因國泰在山東勒索貧劣蹟敗露當卽審明治罪乃甫經懲創郝碩卽於是年藉斂盤費爲名藐法效尤派累屬員朕實

不料封疆大吏有如此牟利貪黷者且恨且愧郝碩著解交刑部
令留京辦事王大臣會同大學士九卿嚴審定擬具奏○戊戌諭
軍機大臣等此次福康安甫抵隆德因躡探路徑卽能擒殺賊匪
趕獲牲畜可見事機湊合滅賊佳兆而先聲所及已足以破逆回
之膽但慮賊人得信復行逃竄然料彼亦無路可去矣據奏見與
海蘭察分派官兵並知會伍岱等於初十日一同分路進剿並飛
咨傅玉永安在石峰堡附近堵截如此四面迎剿截殺賊人更無
難迅速殲除所有擒拏賊匪之侍衛富克精額等甚屬奮勉可嘉
統俟捷音馳到時一併從優議敘再據奏訊之拏獲賊人馬佳英
等供稱底店爲首之賊係馬武舉就是底店回人不知名字等語
底店賊回爲首者竟係武舉實屬罪大惡極福康安進剿務當設
法將該犯生擒解到熱河審明寸磔以伸國法而快人心至武舉

例屬總督管轄何以平時漫無約束縱令謀逆此非尋常失察可比並著福康安查明據實具奏○己亥諭軍機大臣等近日軍營漸有起色旗鼓一新自當立勦匪徒但念此次逆回田五等豈有無故卽能糾合黨羽定期起事遠近回人亦卽附和隨從之理朕於此事再四思維反躬自問自臨御以來數十年兢兢業業並不敢稍存滿假於民生疾苦無不時時廛念務期得所而於甘省尤加意撫恤該省連年以來並未聞水旱災歉斷無貧黎失所致匪徒乘機煽誘或地方官有勒索苛派苦累百姓因而賊人倡亂滋事抑或李侍堯查辦邪教不密致逆回得謊稱勦洗回民藉詞煽誘以上種種各情節思之總不得其故究竟因何而起不得不徹底根究著傳諭阿桂福康安務向擒獲賊目逐一研鞠並於該處詳晰詢訪起釁緣由據實奏覆毋得稍存迴護之見至賊人於上

年卽豫備石峰堡巢穴以爲退守之地其所積糧食器械必多自係陸續運往斷難掩人耳目何以地方文武官弁竟昏如瞽瞍毫無聞見此非尋常失察可比著阿桂福康安查明貽誤之員嚴參治罪至賊人前此肆行無忌往來逃竄其所需糧食等項尙可向各處村莊搶劫今見官兵聲勢壯盛又經福康安等痛加剿戮餘賊自必竄回石峰堡福康安等派兵四面嚴密圍堵後賊人及老幼眷屬不下萬人藏於堡內困守其積蓄自必立形匱乏無從覓食惟防各處邪教匪徒尙有爲之暗中饋送者此等爲賊接濟之人罪與逆賊無異必當嚴密查捕一經拏獲卽究訊姓名居址不可使一名漏網此係盡絕邪教根株之法阿桂福康安當留心遵照妥辦不可稍存姑息○辛丑諭據福康安奏官兵於十一日分爲四路由隆德進剿底店賊眾千餘從山梁壓下官兵槍箭齊發

殺賊甚多有騎馬賊首二人往來指揮拜唐阿薩克丹布放槍打死一人官兵自辰至酉殺賊二百餘名奪得賊營四座卡座十餘處器械帳房牲畜無算海蘭察帶同巴圖魯侍衛追趕敗竄之賊又殺一百餘名等語此次福康安等督率官兵剿殺賊匪奮勇爭先共殲賊二百餘名拜唐阿薩克丹布並能槍斃騎馬賊目一人甚屬奮勉可嘉福康安海蘭察著各賞大荷包一對小荷包二對薩克丹布著擢授藍翎侍衛其餘出力之侍衛章京及官兵兵丁等俱著福康安查明咨部議敘以示獎勵其有出眾特等奮勇者仍卽指名奏聞○壬寅諭大學士三寶歷任督撫宣力有年簡擢綸扉勤慎供職方資倚任此次扈從熱河因其遭疾卽遣太醫診視並令回京調養茲聞溘逝殊爲軫惜其任內降革處分均予開復所有應得卹典著該部察例具奏尋予祭葬諡文敬○丁未諭

廣西布政使員缺著奇豐額調補浦霖著調補安徽布政使卽赴
新任不必來熱河請訓亦無庸馳驛其甘肅布政使員缺著陳步
瀛補授汪新著調補甘肅按察使其湖南按察使員缺著德克進
布補授○諭軍機大臣等保成等奏布魯特比葉爾鐵拜已獲燕
起爲阿哈拉克齊穆拉特私放見爲喀哩提金部落布魯特比薩
瑪齊容留等語殊不成事體綽克托等將沙米爾紮留質作晝晚
諭葉爾鐵拜等所辦尙妥並當諭以拏獲燕起後卽奉有賞給汝
二品頂帶散秩大臣銜花翎元寶等項恩旨汝弟沙米爾紮亦有
升賞見已頒到今燕起逃遁汝若能再獲則恩賞卽可發給其賞
件令沙米爾紮閱看寄信伊兄伊等望此重賞或能將燕起拏到
如不能獲亦不必發兵著保成等遵指示機宜妥辦並諭伊勒圖
知之○戊申諭前據薩載參奏郝碩案內餽送銀兩之司道以下

各員並自請議處一摺當批交該部議奏本日據吏刑二部議將馮應榴吳之黼額爾登布發往軍臺效力贖罪薩載革任具奏此案郝碩於巡撫任內藉斂盤費爲名勒派屬員公幫銀兩貪婪牟利數至累萬盈千且事非一時派非一次在同城之藩司大員凡有奏事之責者尙應據實列款陳奏薩載身爲總督江西係其統轄地方於該省巡撫聲名操守豈得諉爲並無見聞乃該督從無一字奏及經朕得有風聞令薩載至江西順便查訪始據將乾隆四十七八等年郝碩勒派款蹟具摺奏聞在薩載亦知再有袒護獲戾更深故爾據實陳奏且於摺內聲請議處其實該督平時因循不奏之罪不能因此時查辦得實稍爲寬假也且設立督撫原令互相稽察設總督有貪婪之事巡撫尙應參奏豈巡撫有貪婪者總督當諉爲不知乎況朕以薩載歷任封疆辦事尙屬安詳諳

練且在各省總督中年分最久見在三寶病故員缺朕意原欲將
伊補授大學士照尹繼善高晉之例仍留兩江總督之任今薩載
於郝碩如此黷貨營私久而不奏豈尙堪綸扉之任卽此案薩載
之罪若竟予從寬革職留任不足蔽辜著於總督任內罰去養廉
三年仍革職留任以爲總督大員不能舉劾巡撫貪污因循瞻徇
者戒○諭富躬見在患病准其解任回旗調理安徽巡撫員缺著
書麟補授其倉場侍郎員缺著保泰補授保泰所署勒保兵部侍
郎員缺著塔琦署理其刑部右侍郎員缺著景祿補授伊桑阿著
補授直隸布政使其按察使員缺著梁肯堂補授所遺清河道員
缺著朱芫星補授其前任降級之處仍著帶於新任○己酉諭軍
機大臣等前閱福康安所進圖內石峰堡迤東有賊營四處當經
諭令福康安何不先占此四營則賊無可去之路今據奏到奪得

賊人大營四座正與朕前降諭旨相合至所稱此時要著必先扼要放卡斷其水道並周圍創挖溝濠使賊無路竄逸方能制其死命見於石峰堡東南山梁設營數處拏至溝底再於石峰堡西南山散安營三處即可接至黑風墩山梁直達傅玉等軍營會合聯絡等語並另據繪圖進呈閱之一目了然與朕前此發往硃筆原圖脗合辦理俱中窾要此時賊匪已成釜底遊魂官兵轉不必輕於前進以致或有損傷惟當嚴密防範堵截毋使一名免脫爲要卽爲時略久剿除自更淨盡況阿桂帶領京兵暨保甯所帶屯練降番日內早已到彼合力攻圍亦無難剋期蕝事佇待捷音之至至白楊嶺等處逆回想亦係底店石峰堡馬家堡潰出之賊自應分兵往捕速期殺滅但策布坦吉蘭泰二人向未經歷戎行况綠營兵丁又不如京兵之嫻習弓馬著傳諭阿桂福康安卽於巴圖

魯侍衛內選派精細諳練者數員並於復興所帶京兵內每處派撥二百名令其帶往幫同策布坦吉蘭泰上緊搜捕自更得力其馮光熊續調之甘涼等處兵丁亦當暫緩撤回以供搜捕堵截之用此次回匪等訂期起事早蓄逆謀因舉首有人田五等遂倉卒生變迨竄往馬家堡時若剛塔等能嚴防後路及早完結則其餘句結之回眾聞風斂迹逆形未露轉難查辦而李侍堯剛塔仍然安於本任或待至一二年後又不能保無蠢動之事彼時逆謀愈久句結轉多殲除更爲不易今因馬鬍子翻山逃遁而石峰堡底店之賊遂紛紛接應經京兵以次勦捕遂使回匪逆謀畢露轉得徹底根查萌芽淨盡從此永不至再生事端此實仰荷 上天嘉佑朕展轉思維益深敬畏又據奏詢之石峰堡附近居民賊匪於四十六年卽修理石峰堡上年五月又加葺治整固眾所共知等

語是此事李侍堯玩愒貽誤而剛塔在馬家堡縱賊之罪亦無可
追已令軍機大臣札飭解員鳳翔等將伊二人迅速押解熱河審
訊治罪但賊匪似此逆蹟昭彰附近居民既已共見督提大員自
有應得之咎而地方文武員弁何竟毫無覺察稟報以致養癰貽
患著阿桂福康安務卽查明賊匪修理石峰堡時係何員任內之
事卽將貽誤之道府州縣並專管之武職營汛各員一面參奏一
面拏問亦迅速解赴熱河治罪○庚戌諭李侍堯久任封疆歷練
地方事務數十年受朕恩眷最深迨調任雲貴總督後有收受廠
銀等事一經發覺卽將伊拏問革職治罪覈其情節雖非近年王
宜望陳輝祖國泰郝碩等之貪婪賄賂敗檢營私者可比但其簠
簋不飭已隳名節而損廉隅其時彙內外臣工之奏將李侍堯加
恩暫緩典刑適因甘省蘇四十三之事需人辦理善後事宜一時

總督驟不得人李侍堯究屬明白能事是以復將伊補授陝甘總督朕於李侍堯破格加恩原欲其倍加策勵查辦邪教綏靖地方以贖前愆李侍堯稍有人心宜何如感激奮勉仰答朕恩乃本年田五於小山起事作逆李侍堯並不親帶兵丁設法勦捕彼時尙得以審辦賊黨籌畫軍餉爲各追賊於馬家堡翻山逃遁伊乃逗遛靖遠軍營統攝無人賊人遂肆行竄逸旬結經朕於五月十二十三十四等日屢次飭諭始行移駐安定仍與賊蹤遙遠以致賊黨蔓延到處煽誘攻城掠堡擾害良民是李侍堯之畏葸遷延實爲失機偵事況賊人於四十六年卽已修理石峰堡上年五月又加葺治整固且田五陰謀不軌糾眾聚集禮拜寺商同謀逆一切旗幟號衣帳房器械種種齊備足見謀逆已三四年之久李侍堯安坐省城竟同鸛贖是其叅賊養癰釀成事變李侍堯之罪百喙

難辭此事辦理始終貽誤使李侍堯平日如勒爾謹之庸懦昏愊
尙不能曲宥其罪況李侍堯在各省總督中素稱明白能事人所
共知朕之棄瑕錄用亦因其尙有才能冀其感恩出力乃竟於地
方大事貽誤若此朕更不能爲之解亦深自引咎愧恨也至剛塔
身任提督於賊匪起事時未能卽時撲滅及在馬家堡復爲賊人
所誑致令翻山逃竄四出滋擾惟知在後尾追毫無籌畫其罪實
無可逭所有福康安參奏李侍堯剛塔之處俱係實在情形諒伊
等亦無從諉卸著將原摺發交留京王大臣會同大學士九卿科
道覈議定擬具奏○壬子諭軍機大臣等據阿揚阿等奏見在燕
起復逃仍將昆楚克暫留葉爾羌等語著交色提巴爾第開導昆
楚克令其奮勉誘拏燕起若此時昆楚克已放回遊牧卽作書令
昆楚克設法擒拏以圖報效或能拏到亦未可定至色提巴爾第

爲朕最親信之人與鄂斯璘無異此後葉爾羌奏事亦令列名將
此傳諭阿揚阿等遵照辦理